

MESYUARAT KETIGA, PENGGAJ KETIGA  
PARLIMEN KEEMPAT BELAS  
2020

**HARI SELASA : 1 DISEMBER 2020**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 7 HINGGA NO. 60 )**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN  
DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN RAMLI BIN DATO' MOHD NOR  
[ CAMERON HIGHLANDS ]**

**TARIKH : 1 DISEMBER 2020 (SELASA)**

**SOALAN**

minta **MENTERI PEMBANGUNAN LUAR BANDAR** menyatakan adakah jawatan baru bagi Senator Orang Asli serta Ketua Pengarah JAKOA sudah dibuat pemilihan oleh pihak Kerajaan memandangkan kedua-dua jawatan tersebut akan tamat pada penghujung tahun ini.

**JAWAPAN**

**Tuan Yang diPertua,**

Pada ketika ini terdapat dua (2) Senator di kalangan Orang Asli di Dewan Negara. Kedua-duanya akan tamat tempoh pelantikan pada tahun 2021 dan 2022. Pihak Kerajaan akan merancang pelantikan Ahli Dewan Negara bagi mewakili masyarakat Orang Asli sebelum tamat tempoh perkhidmatan Senator sedia ada.

Untuk makluman Dewan Yang Mulia, kontrak sedia ada Ketua Pengarah Jabatan Kemajuan Orang asli (JAKOA) akan tamat pada 28 April 2021. Dalam hal ini, Kerajaan sedang menilai beberapa pilihan yang ada dalam membuat lantikan termasuk mempertimbangkan pelanjutan kontrak Ketua Pengarah sedia ada.

Kerajaan berhasrat untuk mengangkat kedudukan masyarakat Orang Asli agar setanding dengan nilai-nilai kaum melihat akan pentingnya pemimpin yang mempunyai misi, visi yang jelas dan latar belakang yang meyakinkan di dalam mengemudi JAKOA agar dapat memastikan kesinambungan perancangan dan pelaksanaan dasar serta program-program pembangunan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA 2020, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : TUAN SYED SADDIQ BIN SYED ABDUL**  
**RAHMAN [MUAR]**  
**TARIKH : 1 DISEMBER 2020 (SELASA)**

**SOALAN**

Minta **MENTERI PENGAJIAN TINGGI** menyatakan adakah yuran pengajian di IPT awam akan dikurangkan kepada para pelajar? Ini merujuk kepada situasi pengajaran dan pembelajaran yang dijalankan secara '*Open Distance Learning*' (ODL) dan kemudahan universiti tidak lagi boleh digunakan oleh para pelajar buat masa ini.

**JAWAPAN**

**Tuan Yang di-Pertua,**

Dalam situasi sekarang di mana kebanyakan aktiviti pengajaran dan pembelajaran (PdP) dilaksanakan secara dalam talian, termasuklah secara, dengan izin, '*Open Distance Learning*' (ODL), rata-rata kemudahan fizikal di universiti (seperti kemudahan pengangkutan dalam kampus; asrama; dan sebagainya) tidak dapat dimanfaatkan sepenuhnya oleh para pelajar. Kementerian amat prihatin dan mengambil berat terhadap perkara ini yang sedikit sebanyak menyebabkan para pelajar terbeban dengan kos yuran pengajian.

Secara amnya, pelajar di universiti awam (UA) hanya membayar dua hingga sepuluh peratus sahaja daripada kos sebenar program akademik manakala 90 hingga 98 peratus kos yuran pengajian dibiayai melalui subsidi oleh Kerajaan. Sebagai contoh, purata yuran bagi pengajian Sarjana Muda Perubatan di UA yang perlu dibayar oleh pelajar adalah sebanyak RM10,046.00, iaitu bersamaan dengan dua peratus daripada kos sebenar pengajian yang berjumlah RM451,929.00, manakala bakinya, sebanyak RM441,883.00 dibiayai melalui subsidi Kerajaan.

Suka saya maklumkan di sini bahawa KPT telah membuat rundingan dengan pihak Kementerian Kewangan Malaysia (MOF) bagi mengurangkan bebanan kewangan pelajar. Sebagai tanda keprihatinan, Kerajaan telah bersetuju untuk mengurangkan kadar yuran asrama, perkhidmatan dan aktiviti sehingga lima belas peratus setelah mengambil kira keupayaan kewangan Kerajaan dan UA. Pengurangan yuran tersebut adalah bagi Semester Kedua Sesi Akademik 2019/2020 untuk pelajar warganegara Malaysia. Pengurangan yuran ini melibatkan peruntukan sebanyak RM72 juta yang mana RM20 juta merupakan peruntukan tambahan Kerajaan dan RM52 juta menggunakan sumber dalaman UA. Seramai 523,318 pelajar UA di seluruh negara dijangka mendapat manfaat daripada keputusan ini. Langkah yang sama juga telah diteruskan bagi pengajian Semester 1 Sesi 2020/2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK HAJAH AZIZAH BINTI DATUK SERI  
PANGLIMA HAJI MOHD DUN [BEAUFORT]**

**TARIKH : 1 DISEMBER 2020 (SELASA)**

**SOALAN**

**DATUK HAJAH AZIZAH BINTI DATUK SERI PANGLIMA HAJI MOHD DUN [ BEAUFORT ]** minta **MENTERI KEWANGAN** menyatakan bilangan rakyat yang telah menerima manfaat daripada Bantuan Prihatin Nasional 2.0 yang Kerajaan telah luluskan dan berapakah jumlah peruntukan yang terlibat.

**JAWAPAN**

Tuan Yang di-Pertua,

1. Bantuan Prihatin Nasional (BPN) 2.0 merupakan sebahagian daripada **Kerangka Inisiatif Tambahan, Pakej Rangsangan Ekonomi Prihatin Rakyat (KITA PRIHATIN)** bernilai RM10 bilion yang telah diumumkan oleh YAB Perdana Menteri pada 23 September 2020 lalu. Kesemua penerima Bantuan Sara Hidup atau BSH layak menerima bantuan tambahan BPN berkenaan bagi membantu menangani kesan pandemik COVID-19. **Inisiatif BPN 2.0 tersebut yang keseluruhannya berjumlah RM7.0 bilion** akan disalurkan melalui dua fasa pembayaran, iaitu pada bulan Oktober 2020 dan Januari 2021 dengan perincian peruntukan dan penerima BPN 2.0 seperti berikut:-

| Kategori & Pendapatan Bulanan | B40<br>Isi<br>Rumah<br>RM4,000<br>ke<br>bawah | B40<br>Bujang<br>RM2,000<br>ke<br>bawah | M40<br>Isi<br>Rumah<br>RM4,001<br>hingga<br>RM8,000 | M40<br>Bujang<br>RM2,001<br>hingga<br>RM4,000 | Jumlah              |
|-------------------------------|---|---|---|---|---------------------|
| Nilai BPN 2.0                 | RM1,000                                       | RM500                                   | RM600   | RM300   |                     |
| Anggaran<br>Jumlah Pembayaran | RM3.7<br>bilion                               | RM1.9<br>bilion                         | RM0.85<br>bilion                                    | RM0.55<br>bilion                              | <b>RM7.0 bilion</b> |
| Anggaran<br>Jumlah Penerima   | 3.7 juta                                      | 3.8 juta                                | 1.4 juta  | 1.7 juta                                      | <b>10.6 juta</b>    |

2. Pembayaran fasa pertama BPN 2.0 dibuat secara pengkreditan terus ke akaun bank penerima secara berperingkat mulai 19 Oktober 2020. Bagi penerima BPN yang tidak mempunyai akaun bank, pembayaran dibuat secara tunai di kaunter Bank Simpanan Nasional (BSN) mulai 26 Oktober 2020 dan tempoh sah penunaian adalah sehingga 31 Disember 2020. Permohonan baharu BPN 2.0 dibuka mulai 15 Oktober sehingga 15 November 2020, bagi membantu mereka yang belum pernah menerima BPN sebelum ini, termasuk golongan mudah terjejas baharu (*newly vulnerable groups*) yang layak memohon akibat perubahan terhadap status pendapatan mereka ekoran impak penularan COVID-19. Bagi memastikan BPN 2.0 sampai kepada mereka yang benar-benar layak, proses semakan permohonan baharu akan dibuat dalam kadar segera. Bagi mereka yang diluluskan, bayaran akan dibuat secara sekaligus pada bulan Januari 2021.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SIM CHEE KEONG  
[BUKIT MERTA JAM ]**

**TARIKH : 1 DISEMBER 2020 [ SELASA ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan sukan berbasikal kini semakin diminati ramai, jalanraya kini dibanjiri dengan penunggang-penunggang basikal, adakah pihak Kementerian mempunyai perancangan untuk menyediakan kemudahan laluan bagi penunggang basikal.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) menyokong sepenuhnya sukan berbasikal yang semakin diminati ramai pada masa ini. Selaras dengan itu, KPKT melalui Jabatan Landskap Negara (JLN) menyediakan laluan berbasikal sebagai salah satu komponen dalam projek Landskap Perbandaran. Pembangunan laluan basikal ini dibuat bersesuaian mengikut ruang dan penggunaan selaras dengan tujuan Landskap Perbandaran untuk meningkatkan kualiti landskap di bandar-bandar yang menekankan pembangunan jaluran hijau di bandar. Pembangunan laluan pejalan kaki dan basikal di bandar turut bertujuan untuk meningkatkan perhubungan fizikal antara satu kawasan ke kawasan yang lain (*connectivity*).

2. Sehingga kini KPKT telah menyediakan laluan berbasikal menerusi projek Landskap Perbandaran Pekan, Pahang dan projek Landskap Perbandaran Tawau, Sabah. Selain itu, KPKT juga dalam peringkat perancangan membangunkan Landskap Perbandaran Dungun, Terengganu dan Landskap Perbandaran Kota Bharu, Kelantan yang juga akan mempunyai komponen laluan berbasikal.

3. Untuk makluman Yang Berhormat, KPKT melalui Jabatan Kerajaan Tempatan (JKT) juga ada menyediakan peruntukan di bawah BP.1 bagi melaksanakan projek kemudahan laluan basikal di bawah skop peruntukan kemudahan awam di kawasan PBT. Pada tahun 2019, KPKT telah menyalurkan peruntukan sebanyak RM2.17 juta kepada 4 PBT yang melibatkan Dewan Bandaraya Kota Kinabalu, Majlis Bandaraya Pulau Pinang, Majlis Perbandaran Manjung dan Majlis Bandaraya Seberang Perai bagi membina laluan basikal, membina bumbung di laluan basikal dan membina laluan pejalan kaki. Cadangan

pembinaan laluan basikal dari kawasan lain akan dipertimbangkan setelah menerima permohonan dari PBT.

4. Bagi kawasan Putrajaya, kemudahan laluan basikal merupakan satu elemen perancangan yang wajib disediakan oleh pemaju semasa pembangunan baharu sepertimana yang disyaratkan dalam kelulusan Pelan Susun Atur. Perbadanan Putrajaya juga sedang mengkaji perancangan laluan basikal mengguna laluan motosikal. Laluan baharu yang dirancang ini akan melibatkan bulatan luar sejauh 24km dan bulatan dalaman sejauh 18km.

5. Bagi kawasan Kuala Lumpur pula, Dewan Bandaraya Kuala Lumpur (DBKL) telah menyediakan Pelan Induk Pejalan Kaki dan Basikal Kuala Lumpur serta menetapkan jajaran dan spesifikasi laluan basikal dan pejalan kaki dengan mengambil kira semua aspek termasuk aspek keselamatan dan keberkesanan kepada orang awam. Sehingga kini Kuala Lumpur telah membina laluan basikal sepanjang 28.55km.

6. Selain itu, DBKL juga telah menyediakan ruang berbasikal dan rekreasi yang dibangunkan di jajaran River Of Life (ROL) bermula dari jajaran PWTC hingga ke jajaran Mid Valley sepanjang lebih kurang 10.7km merangkumi kawasan tepian sungai dan sebahagian jajaran Jejak Warisan. DBKL juga mempunyai perancangan penyambungan laluan basikal ini yang akan dilaksanakan secara berperingkat. Pada masa yang sama, DBKL juga merancang untuk mengadakan pelan tindakan bagi menggalakkan aktiviti pejalan kaki dan berbasikal selaras dengan hasrat menjadikan Kuala Lumpur Bandaraya Rendah Karbon.

Sekian, terima kasih.

**PEMBERITAHUAN PERTANYAAN  
DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' MOHD. NIZAR BIN HAJI ZAKARIA  
[ PARIT ]**

**TARIKH : 1 DISEMBER 2020 (SELASA)**

**SOALAN**

minta **MENTERI PEMBANGUNAN LUAR BANDAR** menyatakan:-

- (a) berapa jumlah premis Tabika KEMAS yang memerlukan pembaikan segera di seluruh negara; dan
- (b) apakah inisiatif yang telah dilaksanakan oleh pihak KEMAS dalam memastikan semua premis KEMAS sentiasa diselenggara dan dapat beroperasi dengan selamat dan kondusif.

**JAWAPAN**

**Tuan Yang di-Pertua,**

Sehingga tahun 2020, KEMAS mempunyai sebanyak **697 buah premis** TABIKA KEMAS yang memerlukan pembaikan segera di seluruh negara. Walaubagaimanapun, pelaksanaan baikpulih adalah tertakluk kepada peruntukan semasa yang diterima dan status pemilikan tanah dan bangunan yang akan dibaikpulih. Dengan peruntukan terhad yang diterima, Kementerian mensasarkan untuk membaikpulih sebanyak 200 buah premis setiap tahun termasuk melaksanakan penyelenggaraan mengikut keperluan bagi bangunan yang bukan daif.

Untuk makluman Yang Berhormat, KEMAS sentiasa memberi perhatian kepada aspek penyelenggaraan keselamatan semua premis di bawah seliaannya untuk memastikan ia beroperasi dengan baik dan selamat. Hal yang demikian, KEMAS sentiasa mengemaskini senarai premis yang perlu dibaikpulih dan dinaiktaraf dari semasa ke semasa. Berdasarkan Peruntukan Pembangunan dan Peruntukan Mengurus yang telah diluluskan oleh Kerajaan, KEMAS akan melantik agensi teknikal untuk melaksanakan kerja-kerja pembaikan yang telah dikenalpasti.

Dalam RMKe11, KEMAS telah diluluskan peruntukan pembangunan sebanyak RM15 juta dan dengan peruntukan tersebut sebanyak 169 premis telah dan sedang dibaikpulih, manakala untuk peruntukan mengurus sebanyak RM30 juta telah diluluskan dan sebanyak kira-kira 1,500 premis TABIKA/ TASKA yang telah dan sedang dibaikpulih dari tahun 2016 hingga tahun 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK MOHD. AZIS BIN JAMMAN  
[ SEPANGGAR ]**

**TARIKH : 1 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan jumlah sekolah baru yang dibina dan sekolah daif di Sabah yang ditambah baik di bawah Rancangan Malaysia ke-11 (RMK-11) yang telah siap dan dibaiki sepenuhnya berbanding jumlah asal yang dirancang.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik, untuk semua sekolah di seluruh negara. Ini adalah penting untuk memastikan pengajaran dan pembelajaran di sekolah dapat dilaksanakan dalam keadaan selamat dan selesa.

Untuk makluman Ahli Yang Berhormat, khusus untuk negeri Sabah, sebanyak 13 buah projek pembinaan sekolah baharu dan 237 projek menaik taraf dan pembangunan semula sekolah yang mempunyai bangunan daif telah diluluskan dalam Rancangan Malaysia Ke-11 (RMKe11).

Bagi projek pembinaan sekolah baharu, sehingga 6 November 2020, sebanyak tiga (3) buah sekolah berada di fasa pembinaan dan sepuluh (10) buah sekolah lagi berada di fasa pra bina.

Manakala, bagi projek menaik taraf dan pembangunan semula sekolah yang mempunyai bangunan daif, sebanyak 150 buah sekolah telah siap, 22 buah sekolah masih dalam pembinaan dan baki sebanyak 65 buah sekolah masih dalam fasa pra bina.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' HAJI JALALUDDIN BIN HAJI ALIAS  
[JELEBU]**

**TARIKH : 1 DISEMBER 2020 (SELASA)**

**SOALAN**

**DATO' HAJI JALALUDDIN BIN HAJI ALIAS [ JELEBU ]** minta **MENTERI KEWANGAN** menyatakan berapa jumlah keseluruhan permohonan yang diterima untuk melanjutkan tempoh moratorium pinjaman, dan daripada jumlah tersebut, berapakah permohonan yang diluluskan.



**JAWAPAN**

Tuan Yang di-Pertua,

1. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

- a. sejumlah 40% telah memohon pelanjutan moratorium merangkumi individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik COVID-19; dan
- b. sejumlah 60% telah memilih pengurangan bayaran ansuran bulanan merangkumi peminjam yang pendapatannya telah berkurang.

2. Manakala kes permohonan yang tidak diluluskan adalah kecil iaitu sebanyak 2% dan sebab utama permohonan ditolak oleh bank ialah:

- a. Peminjam individu masih mempunyai pekerjaan dengan pendapatan yang stabil, serta isi rumah termasuk pasangan masing-masing yang tidak mengalami pengurangan pendapatan; dan
- b. Peminjam PKS yang memang menghadapi kesukaran kewangan walaupun sebelum penularan wabak COVID-19. Bagi peminjam seperti ini, pelanjutan moratorium bukan satu penyelesaian yang mampan dan bank telah merujuk mereka kepada AKPK untuk mendapatkan bantuan bagi menyelesaikan masalah hutang mereka. AKPK telah menubuhkan “Meja Bantuan Perusahaan Mikro” bagi menawarkan khidmat nasihat kewangan secara percuma dan membantu perusahaan mikro mendapatkan bantuan bayaran balik pinjaman. Terdapat juga sebilangan kes PKS yang sedang melalui prosiding muflis atau pembubaran, atau telah didaftarkan di bawah Program Pengurusan Hutang anjuran AKPK. Bagi peminjam yang

berdaftar di bawah Program Pengurusan Hutang oleh AKPK, mereka boleh berhubung dengan AKPK untuk memohon semakan semula bayaran balik pinjaman yang mencerminkan keadaan kewangan semasa mereka.

**Tuan Yang di-Pertua,**

3. Proses permohonan telah dipermudah dan diringkaskan bagi memastikan bantuan dapat diberikan dengan segera kepada mereka yang memerlukannya. Dalam kebanyakan keadaan, bank hanya menghendaki peminjam untuk mengemukakan penyata bank terkini atau mengisytiharkan bahawa pendapatan mereka telah terjejas akibat pelaksanaan sekatan pergerakan. Bagi penerima Bantuan Prihatin Nasional kumpulan M40 yang memohon pengurangan ansuran mereka, bank juga telah bersetuju untuk menerima pengisytiharan sendiri pengurangan pendapatan yang dialami akibat pandemik COVID-19.

4. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman akan disediakan kepada mereka yang terjejas. Mereka hanya perlu menghubungi bank masing-masing.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' MASIR KUJAT [ SRI AMAN ]**

**TARIKH : 1 DISEMBER 2020 (SELASA)**

**SOALAN**

minta **MENTERI SAINS, TEKNOLOGI DAN INOVASI** menyatakan apakah langkah yang diambil oleh Kementerian tentang pencarian/penyelidikan vaksin untuk menentang COVID-19 dan kolaborasi Kementerian dengan WHO memandangkan peningkatan mendadak kes pandemik ini.

**JAWAPAN**

**Tuan Yang di-Pertua,**

Jaminan akses awal bekalan vaksin COVID-19 adalah penting untuk melindungi rakyat Malaysia dari COVID-19 dan selanjutnya membantu merancakkan ekonomi negara. Justeru, pendekatan *multi-pronged* termasuk penyertaan dalam *Coalition for Epidemic Preparedness Innovations* (CEPI), rundingan *bilateral* secara *Government-to-Government*) dan *multilateral* seperti COVAX Facility; bagi membuka ruang untuk negara mempelbagaikan pilihan serta mengurangkan atau menyebarkan risiko daripada memberikan tumpuan kepada suatu kaedah sahaja.

Jemaah Menteri telah bersetuju untuk Malaysia menyertai inisiatif Malaysia-CEPI *Joint Program for Capacity Building & Technology Transfer* dalam bidang R&D, ujian klinikal di Malaysia ke atas calon vaksin COVID-19 yang dibangunkan oleh CEPI dan pengujian calon vaksin tempatan ke atas COVID-19. Sehubungan itu, MOSTI telah menandatangani **Perjanjian Bilateral Investor dengan CEPI pada 30**

**November 2020** bagi membolehkan Malaysia mendapat akses kepada pembangunan vaksin, pemindahan teknologi dan kepakaran baharu kepada penyelidik tempatan.

Selain daripada itu, Mesyuarat Jemaah Menteri pada 14 Oktober 2020 telah bersetuju supaya Malaysia menyertai COVID-19 *Vaccine Global Access* (COVAX) yang diuruskan oleh *The Global Alliance for Vaccines and Immunizations* (GAVI) yang berpangkalan di Geneva, Switzerland. Malaysia melalui Kementerian Kesihatan telah menandatangani **Perjanjian Commitment Agreement (Optional Purchase Arrangement) COVAX Facility pada 23 November 2020**. Antara kelebihan penyertaan dalam COVAX ialah Malaysia diberi peluang untuk bersama-sama negara lain dalam pembelian secara pukal, berhak melabur dalam calon vaksin COVID-19 yang sedang dikaji dan diberikan akses awal kepada vaksin bagi mengurangkan risiko jangkitan COVID-19. Pendekatan *multilateral* menerusi penyertaan dalam COVAX boleh disifatkan sebagai manifestasi Malaysia terhadap *global solidarity*. Walau bagaimanapun, pembekalan ini hanya melibatkan anggaran 10% populasi sahaja dan Malaysia masih boleh meneruskan perjanjian dengan negara-negara lain yang sedang menjalankan kajian calon vaksin COVID-19.

Selain itu, rundingan secara *bilateral* sedang giat dijalankan dengan pelbagai pihak bagi jaminan akses bekalan vaksin kerana Malaysia berhak untuk membuat pilihan pemerolehan vaksin yang lebih telus bagi mendapat nilai terbaik serta menjaga kepentingan negara secara menyeluruh. Sehubungan itu, **MOSTI telah menandatangani Perjanjian Kerjasama dengan Kementerian Sains dan Teknologi (MOST), Republik Rakyat China (RRC) pada 18 November 2020** bagi memudahkan perolehan vaksin dari syarikat-syarikat pengeluar vaksin dari negara China dengan menggunakan pendekatan *Government to Government* (G2G). Dalam hal ini, dengan pemeteraian perjanjian tersebut, ia dapat meningkatkan hubungan kolaborasi strategik Malaysia dengan RRC dalam bidang vaksin. Usaha sama ini juga dilihat sebagai salah satu langkah jangka masa panjang bagi pembangunan vaksin untuk manusia dijalankan dalam penghasilan pelbagai vaksin yang berkesan dan halal di Malaysia pada masa hadapan.

Selain meneruskan rundingan dan memeterai perjanjian usaha sama mendapatkan akses kepada vaksin COVID-19 dengan negara-negara tertentu secara kerajaan dengan kerajaan (G2G), pembekalan vaksin COVID-19 peringkat komersial (B2B) daripada syarikat-syarikat farmaseutikal dari negara tertentu perlu diambil kira bagi tujuan mendapatkan akses awal kepada vaksin berkenaan. Sehubungan itu, Malaysia melalui **Kementerian Kesihatan telah menandatangani perjanjian pembelian awal dengan syarikat farmaseutikal Pfizer pada 24 November 2020** lalu untuk mendapatkan bekalan vaksin COVID-19.

Kolaborasi sebegini adalah amat penting dalam menggerakkan hubungan diplomatik negara bagi memastikan Malaysia diberi keutamaan serta dilibat sama dalam proses penghasilan vaksin. Diplomasi sains melalui jaringan antarabangsa ini diharap dapat mengurangkan tempoh menunggu bagi Malaysia mendapatkan vaksin.

MOSTI juga telah menawarkan skim dana baharu iaitu MOSTI Combating COVID-19 Fund yang menggalakkan projek R&D dalam memerangi dan mengawal wabak COVID-19. MOSTI telah meluluskan satu projek menerusi tabung ini yang berjumlah RM2.1 juta ke Universiti Malaya bagi pembangunan vaksin COVID19.

Sehingga 12 November 2020, Pertubuhan Kesihatan Sedunia (WHO) melaporkan sebanyak 212 vaksin sedang dibangunkan di peringkat global di mana 48 daripada jumlah tersebut telah mencapai fasa ujian klinikal. Sebanyak 11 daripada 48 calon vaksin ini telah pun berada di ujian klinikal fasa 3. Beberapa buah negara telah mengadakan rundingan dengan pengeluar-pengeluar vaksin bagi mendapatkan jaminan bekalan vaksin seawal mungkin menerusi perjanjian perolehan ke hadapan (*advance purchase agreement*). Setakat ini, KKM telah berhubung dengan sepuluh (10) calon vaksin yang kini berada di peringkat ujian klinikal fasa tiga. Malaysia dijangka memperolehi bekalan vaksin seawal suku pertama tahun 2020/21 bergantung kepada kelulusan oleh *National Pharmaceutical Regulatory Agency* (NPRA) di bawah Kementerian Kesihatan dengan sasaran kumpulan pertama penerima vaksin adalah petugas barisan hadapan sector kesihatan dan bukan kesihatan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HAJI WAN HASSAN BIN MOHD RAMLI  
[ DUNGUN ]**

**TARIKH : 1 DISEMBER 2020**

**SOALAN**

Minta **MENTERI PENDIDIKAN** menyatakan apakah langkah-langkah tindakan bagi menangani masalah ketidakhadiran pelajar-pelajar ke sekolah disebabkan pandemik COVID-19.

**JAWAPAN**

Tuan Yang di-Pertua,

Sejak sekolah dibuka semula mulai 24 Jun 2020, Kementerian Pendidikan Malaysia (KPM) sentiasa memberi perhatian kepada perkara berkaitan kehadiran murid ke sekolah. Ini adalah penting bagi membolehkan pengajaran dan pembelajaran dilaksanakan secara bersemuka dengan lebih berkesan. *Dashboard* KPM dibangunkan bagi memantau kehadiran murid.

Untuk makluman Ahli Yang Berhormat, berdasarkan rekod KPM, purata peratus kehadiran murid ke sekolah bagi tempoh Julai hingga awal Oktober 2020 adalah sebanyak 84.18%. Keadaan ini menunjukkan bahawa kebanyakan ibu bapa yakin dengan langkah-langkah keselamatan yang diambil oleh pihak sekolah dalam memastikan anak-anak mereka berada dalam keadaan selamat di sekolah.

Namun, KPM menyedari masih terdapat ibu bapa yang bimbang akan keselamatan anak mereka jika hadir ke sekolah sekiranya terdapat kes jangkitan COVID-19 di kawasan berdekatan. Justeru, KPM mengambil beberapa pendekatan untuk meningkatkan keyakinan ibu bapa agar terus menghantar anak-anak ke sekolah dan seterusnya meningkatkan peratus kehadiran murid ke sekolah.

Antara pendekatan yang dilaksanakan, guru kelas mengenal pasti punca ketidakhadiran murid ke sekolah pada setiap hari dan seterusnya akan menghubungi ibu bapa/penjaga. Jika ada murid yang dikenal pasti berisiko cicir, guru kelas akan merujuk kepada guru bimbingan dan kaunseling untuk proses intervensi secara berfokus. Tindakan susulan yang bersesuaian diambil oleh pihak sekolah bagi memastikan murid dapat hadir dan mengikuti pembelajaran di sekolah

Di samping itu, KPM juga melaksanakan Program Ziarah Cakna bagi menyantuni murid dan ibu bapa dalam membantu menangani masalah ponteng sekolah. Melalui program ini, konsep penyayang diperluas dan diperkukuhkan ke arah meningkatkan disiplin dan pembangunan diri murid. Usaha ini digiatkan lagi bagi mengenal pasti

punca ketidakhadiran murid di sekolah dan mengesan murid di rumah bagi memastikan intervensi bersesuaian dapat diambil. Program ini masih diteruskan dan disesuaikan dengan mematuhi prosedur operasi standard (SOP) yang sedang berkuat kuasa.

**Tuan Yang Di-Pertua,**

Sepertimana Ahli Yang Berhormat sedia maklum, semua sekolah telah ditutup bermula 9 November 2020 dan murid terus mengikuti pembelajaran secara *Home-Based Learning* sehingga akhir sesi persekolahan tahun 2020.

Sebagai usaha untuk memastikan murid terus mengikuti pembelajaran walaupun sekolah ditutup, Pengajaran dan Pembelajaran di Rumah (PdPR) terus dilaksanakan mengikut kesesuaian dan kesediaan guru serta murid. Dalam tempoh ini, guru juga melaksanakan pentaksiran berterusan bagi menilai perkembangan pembelajaran murid. Selain itu, KPM melaksanakan pemantauan terhadap sesi PdPR yang dijalankan oleh guru. Pemantauan ini melihat pendekatan dan kaedah pengajaran yang digunakan serta bilangan murid yang mengikuti sesi PdPR tersebut. Dapatan pemantauan ini dapat membantu pihak sekolah membuat tindak susul yang lebih berfokus bagi meningkatkan penyertaan dan pelibatan murid dalam PdPR dan seterusnya tidak ketinggalan dalam pembelajaran.

Apabila sesi persekolahan tahun 2021 bermula, guru akan membuat pengesanan tahap penguasaan kemahiran murid dan melaksanakan intervensi yang bersesuaian sebelum mengikuti pembelajaran seterusnya. Dengan kaedah ini, KPM dapat memastikan murid adalah bersedia dan berminat untuk terus belajar.

Sekian, terima kasih.



**PEMBERITAHUAN PERTANYAAN  
DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : PUAN JUNE LEOW HSIAD HUI  
[ HULU SELANGOR ]**

**TARIKH : 1 DISEMBER 2020 (SELASA)**

**SOALAN**

minta **MENTERI PEMBANGUNAN LUAR BANDAR** menyatakan impak COVID-19 terhadap usahawan desa dan bagaimana Kementerian membantu usahawan desa meneruskan perniagaan mereka melalui platform dalam talian.

**JAWAPAN**

**Tuan Yang di-Pertua,**

Impak Pandemik Covid-19 memberi kesan kepada sosio ekonomi seluruh dunia termasuk negara kita, Malaysia. Kesan langsung kepada usahawan luar bandar adalah kerana perniagaan secara fizikal perlu diberhentikan sepanjang tempoh Perintah Kawalan Pergerakan (PKP). Kementerian Pembangunan Luar Bandar (KPLB) sangat prihatin dan membantu usahawan secara dalam talian (*online*) melalui dua pendekatan.

Pertama adalah melalui sokongan dan maklumat bagi meneruskan perniagaan dengan norma baharu. KPLB telah mengadakan program *FB Live Outreach* Usahawan@KPLB bermula pada 23 April sehingga 8 Mei 2020. Program ini melibatkan perkongsian pengalaman dan *tips* perniagaan dari usahawan berjaya serta wakil-wakil agensi kerajaan berkaitan. Sehingga September 2020,

video-video program ini telah mencapai hampir 57,000 tontonan di akaun Facebook Kementerian.

MARA pula telah menyediakan 3 kategori program latihan keusahawanan secara atas talian iaitu *FB Live Talk*, *Biznetwork* dan *Webinar*. Program *FB Live Talk* dan *Biznetwork* telah mencapai angka 687,566 tontonan setakat September 2020. Manakala untuk kursus melalui *Webinar*, sebanyak 15 kursus telah diadakan dengan jumlah peserta seramai 300 orang untuk setiap sesi.

**Tuan Yang Dipertua,**

Pendekatan yang kedua, KPLB membantu usahawan meningkatkan pemasaran produk secara dalam talian. Kementerian telah melaksana inisiatif perkongsian strategik dengan pelbagai pihak melalui [Desamall@KPLB](mailto:Desamall@KPLB). Program ini membantu usahawan memasarkan produk mereka melalui platform e-Dagang seperti Lazada, Shopee, eBay, PrestoMall dan GrabMart. Sehingga 30 September 2020, seramai 1,748 usahawan luar bandar telah dilatih dan sebanyak 21,698 SKU telah dimuatnaik ke dalam platform e-Dagang yang disertai.

Seterusnya, Kementerian juga akan menganjurkan Karnival Usahawan Desa secara dalam talian (online) atau [eKUD@KPLB](mailto:eKUD@KPLB) 2020 pada November dan Disember 2020 bagi mewujudkan kesedaran pembeli berkenaan produk usahawan luar bandar yang boleh dibeli secara dalam talian.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' SRI RICHARD RIOT ANAK  
JAEM [ SERIAN ]**

**TARIKH : 1 DISEMBER 2020 (SELASA)**

**SOALAN**

**DATO' SRI RICHARD RIOT ANAK JAEM [ SERIAN ]** minta **MENTERI KOMUNIKASI DAN MULTIMEDIA** menyatakan usaha untuk meningkatkan liputan telefon dan internet di kawasan luar bandar di seluruh negara khususnya di Sarawak.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian sentiasa memberikan tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi di seluruh negara terutamanya di kawasan luar bandar termasuk di negeri Sarawak.

Di bawah pelan Jalinan Digital Negara (JENDELA), penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.

Sasaran fasa pertama yang kini telah bermula sehingga tahun 2022 adalah :

- a. membolehkan penambahan daripada 4.95 juta premis kepada 7.50 juta premis mendapat akses kepada jalur lebar talian tetap berkelajuan gigabit;
- b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. mempertingkatkan kelajuan purata jalur lebar mudah alih daripada 25Mbps kepada 35Mbps.

Di negeri Sarawak, peluasan rangkaian gentian optik sebanyak 58,371 premis akan disediakan akses kepada perkhidmatan berkelajuan gigabit. Manakala perkhidmatan jalur lebar mudah alih pula, sebanyak 692 menara baharu akan dibina, manakala 2,041 alat pemancar komunikasi sedia ada akan dinaik taraf kepada teknologi 4G.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 1 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan kedudukan Institut Terjemahan dan Buku Malaysia di bawah pentadbiran Kerajaan sekarang serta ketetapan sama ada urusan tender penerbitan buku teks CEFR akan diberikan kepada ITBM secara runding terus memandangkan ia sebuah agensi Kerajaan yang terkait dengan penterjemahan dan penerbitan.

**JAWAPAN**

Tuan Yang di-Pertua,

Institut Terjemahan & Buku Malaysia (ITBM) merupakan agensi di bawah Kementerian Pendidikan Malaysia (KPM) yang terlibat dalam industri penterjemahan dan penerbitan. ITBM pada ketika ini kekal melaksanakan fungsi dan peranan melalui empat khidmat utama iaitu terjemahan, kejurubahasaan, kursus dan latihan serta penerbitan buku.

Mesyuarat Jemaah Menteri pada 12 Jun 2019, 20 Jun 2019 dan 6 Disember 2019 yang telah mempertimbang dan bersetuju agar ITBM diberikan nilai kontrak perolehan buku teks secara rundingan terus. Susulan itu, KPM telah mendapatkan kelulusan daripada Kementerian Kewangan untuk meluluskan pemberian Projek CEFR Tahun 6 secara runding terus kepada ITBM. Surat Setuju Terima (SST) telah diberikan kepada ITBM pada 23 September 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
[ PONTIAN ]**

**TARIKH : 1 DISEMBER 2020 (SELASA)**

**SOALAN**

Minta **MENTERI SAINS, TEKNOLOGI DAN INOVASI** menyatakan usaha yang dibuat di dalam dan luar negara bagi menghasilkan vaksin COVID-19 serta bukti kejayaannya dan perancangan Kerajaan untuk memberi vaksin itu secara percuma kepada rakyat.

**JAWAPAN**

**Tuan Yang di-Pertua,**

Jaminan akses awal bekalan vaksin COVID-19 adalah penting untuk melindungi rakyat Malaysia dari COVID-19 dan selanjutnya membantu merencanakan ekonomi negara. Justeru, pendekatan *multi-pronged* termasuk penyertaan dalam *Coalition for Epidemic Preparedness Innovations* (CEPI), rundingan *bilateral* secara *Government-to-Government*) dan *multilateral* seperti COVAX Facility; bagi membuka ruang untuk negara mempelbagaikan pilihan serta mengurangkan atau menyebarkan risiko daripada memberikan tumpuan kepada suatu kaedah sahaja.

Jemaah Menteri telah bersetuju untuk Malaysia menyertai inisiatif Malaysia-CEPI *Joint Program for Capacity Building & Technology Transfer* dalam bidang R&D, ujian klinikal di Malaysia ke atas calon vaksin COVID-19 yang dibangunkan oleh CEPI dan pengujian calon vaksin tempatan ke atas COVID-19. Sehubungan itu, MOSTI telah menandatangani **Perjanjian Bilateral Investor dengan CEPI pada 30**

**November 2020** bagi membolehkan Malaysia mendapat akses kepada pembangunan vaksin, pemindahan teknologi dan kepakaran baharu kepada penyelidik tempatan.

Selain daripada itu, Mesyuarat Jemaah Menteri pada 14 Oktober 2020 telah bersetuju supaya Malaysia menyertai COVID-19 *Vaccine Global Access* (COVAX) yang diuruskan oleh *The Global Alliance for Vaccines and Immunizations* (GAVI) yang berpangkalan di Geneva, Switzerland. Malaysia melalui Kementerian Kesihatan telah menandatangani **Perjanjian Commitment Agreement (Optional Purchase Arrangement) COVAX Facility** pada **23 November 2020**. Antara kelebihan penyertaan dalam COVAX ialah Malaysia diberi peluang untuk bersama-sama negara lain dalam pembelian secara pukal, berhak melabur dalam calon vaksin COVID-19 yang sedang dikaji dan diberikan akses awal kepada vaksin bagi mengurangkan risiko jangkitan COVID-19. Pendekatan *multilateral* menerusi penyertaan dalam COVAX boleh disifatkan sebagai manifestasi Malaysia terhadap *global solidarity*. Walau bagaimanapun, pembekalan ini hanya melibatkan anggaran 10% populasi sahaja dan Malaysia masih boleh meneruskan perjanjian dengan negara-negara lain yang sedang menjalankan kajian calon vaksin COVID-19.

Selain itu, rundingan secara *bilateral* sedang giat dijalankan dengan pelbagai pihak bagi jaminan akses bekalan vaksin kerana Malaysia berhak untuk membuat pilihan pemerolehan vaksin yang lebih telus bagi mendapat nilai terbaik serta menjaga kepentingan negara secara menyeluruh. Sehubungan itu, **MOSTI telah menandatangani Perjanjian Kerjasama dengan Kementerian Sains dan Teknologi (MOST), Republik Rakyat China (RRC) pada 18 November 2020** bagi memudahkan perolehan vaksin dari syarikat-syarikat pengeluar vaksin dari negara China dengan menggunakan pendekatan *Government to Government* (G2G). Dalam hal ini, dengan pemeteraian perjanjian tersebut, ia dapat meningkatkan hubungan kolaborasi strategik Malaysia dengan RRC dalam bidang vaksin. Usaha sama ini juga dilihat sebagai salah satu langkah jangka masa panjang bagi pembangunan vaksin untuk manusia dijalankan dalam penghasilan pelbagai vaksin yang berkesan dan halal di Malaysia pada masa hadapan.

## NO. SOALAN : 19

Selain meneruskan rundingan dan memeterai perjanjian usaha sama mendapatkan akses kepada vaksin COVID-19 dengan negara-negara tertentu secara kerajaan dengan kerajaan (G2G), pembekalan vaksin COVID-19 peringkat komersial (B2B) daripada syarikat-syarikat farmaseutikal dari negara tertentu perlu diambil kira bagi tujuan mendapatkan akses awal kepada vaksin berkenaan. Sehubungan itu, Malaysia melalui **Kementerian Kesihatan telah menandatangani perjanjian pembelian awal dengan syarikat farmaseutikal Pfizer pada 24 November 2020** lalu untuk mendapatkan bekalan vaksin COVID-19.

Kolaborasi sebegini adalah amat penting dalam menggerakkan hubungan diplomatik negara bagi memastikan Malaysia diberi keutamaan serta dilibat sama dalam proses penghasilan vaksin. Diplomasi sains melalui jaringan antarabangsa ini diharap dapat mengurangkan tempoh menunggu bagi Malaysia mendapatkan vaksin.

MOSTI juga telah menawarkan skim dana baharu iaitu MOSTI Combating COVID-19 Fund yang menggalakkan projek R&D dalam memerangi dan mengawal wabak COVID-19. MOSTI telah meluluskan satu projek menerusi tabung ini yang berjumlah RM2.1 juta ke Universiti Malaya bagi pembangunan vaksin COVID19.

Sehingga 12 November 2020, Pertubuhan Kesihatan Sedunia (WHO) melaporkan sebanyak 212 vaksin sedang dibangunkan di peringkat global di mana 48 daripada jumlah tersebut telah mencapai fasa ujian klinikal. Sebanyak 11 daripada 48 calon vaksin ini telah pun berada di ujian klinikal fasa 3. Beberapa buah negara telah mengadakan rundingan dengan pengeluar-pengeluar vaksin bagi mendapatkan jaminan bekalan vaksin seawal mungkin menerusi perjanjian perolehan ke hadapan (*advance purchase agreement*). Setakat ini, KKM telah berhubung dengan sepuluh (10) calon vaksin yang kini berada di peringkat ujian klinikal fasa tiga. Malaysia dijangka memperolehi bekalan vaksin seawal suku pertama tahun 2020/21 bergantung kepada kelulusan oleh *National Pharmaceutical Regulatory Agency* (NPRA) di bawah Kementerian Kesihatan dengan sasaran kumpulan pertama penerima vaksin adalah petugas barisan hadapan sector kesihatan dan bukan kesihatan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK SERI PANGLIMA WILFRED  
MADIUS TANGAU [TUARAN]**

**TARIKH : 01 DISEMBER 2020 (SELASA)**

**SOALAN**

**DATUK SERI PANGLIMA WILFRED MADIUS TANGAU [ TUARAN ]**  
minta **MENTERI KEWANGAN** menyatakan berapa pungutan hasil  
sepanjang tahun ini setakat ini dan berapa pula perbelanjaan mengurus  
Kerajaan pada masa yang sama.

**JAWAPAN**

Tuan Yang di-Pertua,

1. Impak wabak COVID-19 dan inisiatif Kerajaan dalam menanganinya sudah tentu akan memberi kesan kepada kedudukan kewangan Kerajaan Persekutuan. Sebagai contoh, kutipan hasil Kerajaan pada tahun 2020 telah disemak semula kepada RM227.3 bilion iaitu RM17.2 billion atau 7% lebih rendah daripada anggaran asal. Berikutan aktiviti ekonomi domestik yang lebih perlahan serta jangkaan harga minyak mentah yang lebih rendah, hasil cukai dijangka lebih rendah sebanyak RM36.6 bilion atau 19.3% kepada RM153.3 bilion berbanding anggaran asal sebanyak RM189.9 bilion. Bagi tahun 2020, hasil bukan cukai pula dijangka berjumlah RM74 bilion.

2. Jumlah perbelanjaan bagi tahun 2020 pula dianggar meningkat kepada RM314.7 bilion susulan pertambahan perbelanjaan bagi melaksanakan pakej rangsangan dan pelan pemulihan ekonomi. Daripada jumlah RM314.7 bilion tersebut, RM226.7 bilion disediakan untuk perbelanjaan mengurus, RM50 bilion untuk perbelanjaan pembangunan manakala RM38 bilion untuk Kumpulan Wang COVID-19. Justeru, defisit fiskal pada tahun 2020 telah disemak semula dan dianggar meningkat kepada 6.0% kepada KDNK berbanding anggaran asal sebanyak 3.2%.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN SANISVARA NETHAJI RAYER  
A/L RAJAJI [JELUTONG]**

**TARIKH : 1 DISEMBER 2020 (SELASA)**

**SOALAN**

**TUAN SANISVARA NETHAJI RAYER A/L RAJAJI [ JELUTONG ]** minta **MENTERI KEWANGAN** menyatakan adakah Kerajaan bercadang untuk memberikan satu lagi imbuhan atau bonus kepada semua '*frontliners*' atau petugas barisan hadapan yang telah bertungkus lumus sejak penularan wabak COVID-19.

**JAWAPAN**

Untuk makluman Ahli Yang Berhormat,

1. Kerajaan mengiktiraf petugas barisan hadapan kita yang tetap kental memberikan perkhidmatan dengan penuh jitu demi keselamatan dan kesejahteraan Rakyat, dalam membendung penularan wabak COVID-19 di negara kita.
2. Sejak Mac, Kerajaan telah menyalurkan Elaun Khas COVID-19 sebanyak RM200 dan RM600 sebulan kepada semua barisan hadapan di bawah Kementerian Kesihatan Malaysia (KKM) atau menurut takrifan kelayakan Agensi Pengurusan Bencana Negara (NADMA) seperti tentera, polis, kastam, imigresen, Angkatan Pertahanan Awam serta Jabatan Sukarelawan Malaysia.
3. Pada masa yang sama, Kerajaan semasa pembentangan Belanjawan 2021 juga telah bersetuju memberi bantuan tambahan secara *one-off* sebanyak RM500 bagi menghargai jasa anggota barisan hadapan KKM yang dijangka memanfaatkan 100 ribu petugas kesihatan.
4. Setelah mendengar cadangan daripada ahli-ahli Yang Berhormat susulan sesi perbahasan yang diadakan selepas pengumuman Belanjawan 2021 pada 6 November lalu mengenai perlunya mempertimbangkan bantuan khas untuk barisan hadapan yang lain, Kerajaan semasa sesi penggulungan Belanjawan 2021 pada 26 November 2020 juga telah bersetuju untuk memanjangkan bantuan khas secara *one-off* sebanyak RM300 kepada semua petugas barisan hadapan lain yang layak berdasarkan takrifan Agensi Pengurusan Bencana Negara (NADMA).

**PEMBERITAHUAN PERTANYAAN  
DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN RAMLI BIN DATO' MOHD NOR  
[ CAMERON HIGHLANDS ]**

**TARIKH : 1 DISEMBER 2020 (SELASA)**

**SOALAN**

minta **MENTERI PEMBANGUNAN LUAR BANDAR** menyatakan adakah pihak Kementerian bercadang untuk mengembalikan semula bantuan-bantuan penuh dalam sektor pendidikan kepada masyarakat Orang Asli seperti yang telah diberikan semasa zaman pentadbiran Kerajaan Barisan Nasional iaitu biasiswa, bantuan pakaian seragam sekolah dan lain lagi bermula daripada peringkat pra-sekolah sehingga ke peringkat IPTA.

**JAWAPAN**

**Tuan Yang di-Pertua,**

Kementerian Pembangunan Luar Bandar (KPLB) melalui Jabatan Kemajuan Orang Asli (JAKOA) sangat komited dalam membantu masyarakat Orang Asli terutama dalam bidang pendidikan. Bantuan-bantuan pendidikan yang disediakan oleh Kerajaan melalui JAKOA masih diteruskan menerusi Skim Bantuan Galakkan Pendidikan dari peringkat rendah hingga pelajar peringkat Institut Pengajian Tinggi (IPT).

Komitmen Kerajaan dalam menggalakkan anak-anak Orang Asli ke menara gading seperti bantuan Pendidikan (biasiswa) masih diteruskan setiap tahun dengan peruntukan dan jumlah penerima seperti berikut :

| <b>Bil.</b> | <b>Tahun</b> | <b>Peruntukan<br/>(RM)</b>  | <b>Penerima (Pelajar IPT)</b> |                     |
|-------------|--------------|-----------------------------|-------------------------------|---------------------|
|             |              |                             | <b>Pelajar<br/>Sediaada</b>   | <b>Pelajar Baru</b> |
| 1.          | 2018         | 5,361,800.00                | 836                           | 253                 |
| 2.          | 2019         | 5,021,300.00                | 1145                          | 348                 |
| 3.          | 2020         | 2,559,416.75<br>(30/9/2020) | 1090                          | 114                 |

Bagi Bantuan pakaian seragam sekolah, Kementerian melalui JAKOA sedang dalam proses jawatankuasa pemutus tender tiga (3) tahun untuk bantuan pakaian seragam sekolah murid darjah satu (1) dan tingkatan satu (1) dengan anggaran peruntukan sebanyak RM1.5 juta setahun dan seramai 7,068 murid Orang Asli bakal menerima manfaat

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT**

**PERTANYAAN : LISAN**

**DARIPADA : TUAN WONG CHEN [SUBANG]**

**TARIKH : 1 DISEMBER 2020 (SELASA)**

**SOALAN**

**TUAN WONG CHEN [ SUBANG ]** minta **MENTERI KEWANGAN** menyatakan:-

- (a) kedudukan dan rasional pihak Kerajaan berkenaan isu menyokong Malaysia Airlines secara kewangan ; dan
- (b) adakah kedudukan pihak Kerajaan berbeza dengan Khazanah Nasional.

**JAWAPAN****Jawapan (a)**

1. Tuan Yang Dipertua, kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.
2. Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion.
3. Prestasi kewangan MAGB antara tahun 2015 hingga 2018 adalah seperti berikut:-

| <b>Tahun</b> | <b>Keuntungan/ (Kerugian) - RM</b> |
|--------------|------------------------------------|
| 2015         | (1.1b)                             |
| 2016         | (0.7b)                             |
| 2017         | (1.2b)                             |
| 2018         | (1.3 b)                            |

4. Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.
5. Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut. Proses penstrukturan semula turut melibatkan perundingan dengan pihak pemiutang dan pajakan pesawat.



6. Pada masa ini, Kerajaan tidak terlibat dalam apa-apa pelan menyelamatkan (bail out) mana-mana syarikat penerbangan komersial termasuk memberi pinjaman atau jaminan kepada Air Asia selaras dengan kenyataan akhbar yang dikeluarkan oleh Kementerian Kewangan pada 13 Oktober 2020.

**Jawapan (b)**

7. Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.

8. Selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : PUAN NURUL IZZAH BINTI ANWAR  
[PERMATANG PAUH]**

**TARIKH : 1 DISEMBER 2020 (SELASA)**

**SOALAN**

**PUAN NURUL IZZAH BINTI ANWAR [ PERMATANG PAUH ] minta  
MENTERI KEWANGAN menyatakan:-**

(a)pelan Kerajaan untuk memulihkan sektor yang paling terkesan daripada wabak COVID-19, dan sama ada akan dipertimbangkan peningkatan subsidi upah bagi sektor-sektor ini; dan

(b)usaha Kerajaan untuk memantau program subsidi upah bagi mencegah penyalahgunaan dan monopoli oleh majikan tidak bertanggungjawab.

**JAWAPAN**

Tuan Yang di-Pertua,

1. Untuk makluman Ahli Yang Berhormat, sebagai usaha memulihkan sektor ekonomi yang paling terkesan akibat COVID-19 seperti sektor pelancongan dan PKS Mikro, Kerajaan melalui pakej PRIHATIN, PENJANA dan KITA PRIHATIN telah melaksanakan inisiatif-inisiatif bagi menyokong pemulihan dan pertumbuhan sektor tersebut.
2. Bagi sektor pelancongan, Kerajaan telah menyalurkan inisiatif bantuan tunai secara *one-off* kepada golongan yang terkesan secara langsung seperti pemandu teksi, pemandu pelancong, pemandu bas pelancongan dan pemandu *e-hailing*. Bagi perniagaan yang tertakluk kepada bayaran ansuran bulanan cukai pendapatan di bawah industri pelancongan seperti agensi pelancongan, pengusaha hotel dan syarikat penerbangan, mereka turut diberikan kemudahan penangguhan bayaran ansuran ke atas anggaran cukai yang kena dibayar bagi meringankan beban perniagaan dalam menghadapi pandemik COVID-19. Selain itu, bagi menggalakkan pelancongan domestik, beberapa bentuk insentif cukai juga telah diumumkan seperti pengecualian cukai perkhidmatan ke atas hotel, pengecualian cukai pelancongan serta pelepasan cukai pendapatan individu untuk perbelanjaan perjalanan domestik.
3. Kerajaan turut melaksanakan Skim Pembiayaan Pelancongan PENJANA (PTF) di bawah Bank Negara Malaysia bagi membantu perniagaan dari sektor pelancongan untuk mendapatkan bantuan pembiayaan. Bagi sektor PKS dan PKS Mikro pula, Kerajaan telah melaksanakan pemberian Geran Khas Prihatin, skim pembiayaan mikro kredit di bawah Bank Simpanan Nasional (BSN) dan TEKUN serta Skim Pembiayaan PKS PENJANA bagi menyokong sumber kewangan PKS dan PKS Mikro dalam membolehkan mereka kembali beroperasi seperti biasa.
4. Selaras pengumuman Belanjawan 2021, Kerajaan telah mengumumkan pemberian subsidi upah secara bersasar selama 3 bulan kepada sektor pelancongan dan peruncitan di mana program ini telah menaikkan had kepada majikan yang mempunyai pekerja seramai

500 orang berbanding 200 orang sebelum ini. Bagi memastikan pelaksanaan Program Subsidi Upah (PSU) ini tidak disalah guna oleh majikan yang tidak bertanggungjawab, pihak PERKESO selaku agensi yang bertanggungjawab bagi pelaksanaan PSU telah menetapkan beberapa proses pemantauan seperti:

- i. Menyediakan saluran aduan melalui eAduan PSU iaitu sebuah borang aduan dalam talian sebagai platform pertanyaan dan pelaporan sebarang isu berkaitan PSU;
- ii. Mempamerkan senarai majikan yang telah berjaya memohon secara dalam talian;
- iii. Menyemak-silang bayaran caruman pekerja di dalam pangkalan data PERKESO untuk memastikan pematuhan syarat;
- iv. Menggantung dan menyiasat sebarang penipuan atau pelanggaran syarat;
- v. Menubuhkan mekanisme bagi memulangkan bayaran subsidi upah kepada PERKESO disebabkan oleh pelanggaran syarat;
- vi. Berunding untuk pembayaran upah dan pematuhan syarat; dan
- vii. Bekerjasama dengan pihak Suruhanjaya Pencegahan Rasuah Malaysia (SPRM) untuk mendakwa majikan yang melanggar syarat.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN CHAN MING KAI [ALOR SETAR]**

**TARIKH : 1 DISEMBER 2020 (SELASA)**

**SOALAN**

**TUAN CHAN MING KAI [ ALOR SETAR ]** minta **MENTERI KEWANGAN** menyatakan berapa syarikat dalam senarai kontrak panel berpusat Kementerian Kewangan yang berdaftar dan tidak berdaftar dengan LHDN serta cukai pendapatan yang telah dikutip.

**JAWAPAN**

**Tuan Yang di-Pertua,**

1. Bagi membolehkan sesebuah syarikat menyertai kontrak panel berpusat, syarikat ini mestilah syarikat yang berdaftar dengan Suruhanjaya Syarikat Malaysia dan Kementerian Kewangan. Seterusnya, adalah menjadi tanggungjawab syarikat berkenaan untuk berdaftar dengan Lembaga Hasil Dalam Negeri Malaysia (LHDN) bagi tujuan fail cukai pendapatan syarikat walaupun belum memulakan operasi perniagaan.
2. Bermula tahun 2010, penambahbaikan telah dilakukan menerusi sistem MyCOID yang mana SSM akan menghantar senarai syarikat berdaftar kepada LHDN bagi tujuan semakan, dan sekiranya tiada maklumat pendaftaran fail cukai pendapatan, LHDN akan mengambil tindakan yang sewajarnya dengan mendaftarkan fail cukai pendapatan bagi syarikat yang berkenaan. Justeru, adalah menjadi kewajipan kepada syarikat untuk mengemukakan borang nyata cukai pendapatan setiap tahun bagi mengelak daripada dikenakan penalti.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' HJ MOHD. SALIM SHARIF [JEMPOL]**

**TARIKH : 1 DISEMBER 2020 (SELASA)**

**SOALAN**

**DATO' HJ MOHD. SALIM SHARIF [ JEMPOL ]** minta **MENTERI KEWANGAN** menyatakan perkembangan semasa mengenai lanjutan moratorium dan bantuan bank bersasar serta respons yang diberikan oleh rakyat terhadap inisiatif tersebut.

**JAWAPAN**

**Tuan Yang Di-Pertua,**

1. Kerajaan telah memberikan moratorium ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara keseluruhan berakhir.
2. Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021.

3. Ekoran daripada gelombang ketiga COVID-19 baru-baru ini, Kerajaan telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000, akan turut menikmati bantuan yang serupa.

4. Peminjam dari golongan B40 diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

5. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

a) sejumlah 40% telah memohon pelanjutan moratorium merangkumi individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik COVID-19; dan

b) sejumlah 60% telah memilih pengurangan bayaran ansuran bulanan merangkumi peminjam yang pendapatannya telah berkurang.

6. Manakala kes permohonan yang tidak diluluskan adalah kecil sebanyak 2% dan sebab utama permohonan ditolak oleh bank ialah:

a) Peminjam individu masih mempunyai pekerjaan dengan pendapatan yang stabil, serta isi rumah termasuk pasangan masing-masing yang tidak mengalami pengurangan pendapatan; dan

b) Peminjam PKS yang memang menghadapi kesukaran kewangan walaupun sebelum penularan wabak COVID-19. Bagi peminjam seperti ini, pelanjutan moratorium bukan satu penyelesaian yang mampan dan bank telah merujuk mereka kepada AKPK untuk mendapatkan bantuan bagi menyelesaikan masalah hutang mereka. AKPK telah menubuhkan “Meja Bantuan Perusahaan Mikro” bagi menawarkan khidmat nasihat kewangan secara percuma dan membantu perusahaan mikro mendapatkan bantuan bayaran balik pinjaman. Terdapat juga sebilangan kes PKS yang sedang melalui prosiding muflis atau pembubaran, atau telah didaftarkan di bawah Program Pengurusan Hutang anjuran AKPK. Bagi peminjam yang berdaftar di bawah Program Pengurusan Hutang oleh AKPK, mereka boleh berhubung dengan AKPK untuk memohon semakan semula bayaran balik pinjaman yang mencerminkan keadaan kewangan semasa mereka.

**Tuan Yang Di-Pertua,**

7. Proses permohonan telah dipermudah dan diringkaskan bagi memastikan bantuan dapat diberikan dengan segera kepada mereka yang memerlukannya. Dalam kebanyakan keadaan, bank hanya menghendaki peminjam untuk mengemukakan penyata bank terkini atau mengisytiharkan bahawa pendapatan mereka telah terjejas akibat pelaksanaan sekatan pergerakan. Bagi penerima Bantuan Prihatin Nasional kumpulan M40 yang memohon pengurangan ansuran mereka, bank juga telah bersetuju untuk menerima pengisytiharan sendiri pengurangan pendapatan yang dialami akibat pandemik COVID-19.

8. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman akan disediakan kepada mereka yang terjejas. Mereka hanya perlu menghubungi bank masing-



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' DR. XAVIER JAYAKUMAR A/L  
ARULANANDRAM [ KUALA LANGAT ]**

**TARIKH : 1 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan status sekolah rendah dan sekolah menengah yang amat diperlukan di kawasan Bandar Saujana Putra. Adakah Kementerian Pendidikan akan segerakan pembinaan sekolah rendah dan sekolah menengah di kawasan Bandar Saujana Putra.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan yang selesa kepada semua murid di seluruh negara.

Untuk makluman Ahli Yang Berhormat, bagi menampung keperluan pendidikan penduduk di Bandar Saujana Putra, Selangor, Projek Pembinaan Sekolah Menengah Kebangsaan Bandar Saujana Putra dan Sekolah Kebangsaan Bandar Saujana Putra, Telok Datok, Kuala Langat, Selangor telah diluluskan dalam *Rolling Plan 1* (Tahun 2016) Rancangan Malaysia Ke-11 (RMKe-11). Pelaksanaan bagi kedua-dua projek ini adalah di bawah seliaan KPM.

Bagi projek SMK Bandar Saujana Putra, skop projek melibatkan pembinaan baharu 30 bilik darjah dan kemudahan lain dengan dengan kos projek berjumlah RM38 juta. Projek ini telah dimulakan pada 5 Januari 2017 dengan tarikh asal siap 3 Januari 2019 dan telah mendapat lanjutan masa sehingga 30 September 2019. Manakala, projek SK Saujana Putra pula melibatkan pembinaan baharu 24 bilik darjah dan kemudahan lain dengan kos projek berjumlah RM28 juta. Projek ini telah dimulakan pada 11 Januari 2018 dengan tarikh asal siap 11 Julai 2019 dan telah mendapat lanjutan masa sehingga 18 Januari 2020.

Namun begitu, kontraktor bagi kedua-dua projek ini telah ditamatkan kontrak pada 20 Januari 2020, iaitu setelah pihak kontraktor mendapat Perintah Pengulungan dari Jabatan Insolvensi Malaysia. Sehingga 20 Januari 2020, kemajuan kerja-kerja pembinaan bagi projek SMK Bandar Saujana Putra adalah sebanyak 95.58% dan SK Bandar Saujana Putra pula sebanyak 45%.

Bagi memastikan projek pembinaan SMK Bandar Saujana Putra dan SK Bandar Saujana Putra disiap dan boleh beroperasi, projek ini akan ditender semula. Pada masa ini, KPM sedang memuktamadkan dokumentasi untuk tujuan tender semula projek SMK Bandar Saujana Putra dan dijangka akan diiklankan pada Disember 2020. Sekolah ini dijangka akan siap dibina pada Mac 2022. Di samping itu, KPM juga sedang memuktamadkan kos serta skop projek SK Bandar Saujana Putra dan dijangka akan ditender pada Januari 2021. Sekolah ini dijangka akan siap dibina pada bulan Ogos 2022.

KPM terus komited dan akan memantau pelaksanaan projek ini dengan rapi supaya kedua-dua projek dapat disiapkan mengikut jadual bagi memenuhi keperluan persekolahan anak-anak penduduk di Bandar Saujana Putra.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DR. ONG KIAN MING [BANGI]**

**TARIKH : 1 DISEMBER 2020 (SELASA)**

**SOALAN**

**DR. ONG KIAN MING [ BANGI ]** minta **MENTERI KEWANGAN** menyatakan untuk menyatakan pecahan Dana PENJANA Nasional yang berjumlah RM600 juta mengikut jenis dana (misalnya *seed stage, series A/B funds, opportunistic fund*) dan juga jumlah dana yang dilaburkan oleh pihak swasta untuk inisiatif ini. Berapa jumlah dana ini telah dilaburkan.

**JAWAPAN**

**Tuan Yang di-Pertua,**

1. Dana Penjana Nasional adalah dana pelaburan teknologi bagi sektor modal teroka dan permulaan atau dengan izin *Venture Capital*. Dana ini merangkumi keseluruhan kitaran hayat pelaburan awal termasuk *Seed/Co-Creation*, *Early Stage (Series A/B)*, *Growth Stage*, dan *Venture Debt*. Tujuan dana ini adalah bagi memacu pemulihan ekonomi negara dan merancakkan penyertaan pelaburan pihak swasta di dalam sektor berimpak tinggi terutamanya pelabur antarabangsa yang mejalinkan usaha sama strategik dengan pelabur domestik.
2. Sejumlah RM600 juta akan disuntik daripada kerajaan bagi Dana Penjana Nasional. Daripada jumlah tersebut, RM50 juta adalah untuk *Seed/Co-Creation*, RM200 juta untuk *Early Stage*, RM250 juta untuk *Growth Stage*, dan RM100 juta untuk *Venture Debt*.
3. Jumlah ini akan dipadankan secara *one-to-one* dengan pelaburan daripada pihak swasta. Dana 'Fund of Funds' (FOF) dengan jumlah keseluruhan bernilai RM1.2 bilion ini akan memanfaatkan perniagaan peringkat awal yang inovatif serta industri modal teroka di Malaysia. Dana ini dikendalikan Penjana Kapital iaitu syarikat yang ditubuhkan Kementerian Kewangan Diperbadankan bagi memastikan tadbir urus dan pemantauan ketat dalam penyaluran dana berkenaan.
4. Penjana Kapital telah mengeluarkan surat hasrat (LOI) kepada 8 pengurus dana *Venture Capital* dan rundingan berkaitan terma syarat pelaburan akan berlangsung pada bulan November.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN MUHAMMAD BAKHTIAR  
BIN WAN CHIK [BALIK PULAU]**

**TARIKH : 1 DISEMBER 2020 (SELASA)**

**SOALAN**

**TUAN MUHAMMAD BAKHTIAR BIN WAN CHIK [ BALIK PULAU ]** minta **MENTERI KEWANGAN** menyatakan rasional Kerajaan meluluskan RM1 bilion pinjaman yang dijamin oleh Kementerian Kewangan kepada Syarikat penerbangan AirAsia sedangkan Syarikat penerbangan negara MAB (Malaysian Airlines Berhad) juga memerlukan suntikan dana.

**JAWAPAN**

1. Tuan Yang Dipertua, untuk makluman, Kerajaan komited untuk membantu semua pihak yang terjejas dengan penularan wabak COVID-19 termasuk sektor penerbangan dan pengangkutan udara. Sehubungan dengan itu, Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

2. Walau bagaimanapun, pada masa ini, Kerajaan tidak terlibat dalam apa-apa pelan menyelamatkan (*bail out*) mana-mana syarikat penerbangan komersial termasuk memberi pinjaman atau jaminan kepada Air Asia selaras dengan kenyataan akhbar yang dikeluarkan oleh Kementerian Kewangan pada 13 Oktober 2020.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI DR. AHMAD ZAHID BIN HAMIDI  
[ BAGAN DATUK ]**

**TARIKH : 1 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan sejauh manakah penjadualan semula peperiksaan SPM, SPMV, STPM dan STAM bakal memberi kesan kepada prestasi pencapaian pelajar dalam peperiksaan tersebut.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) telah membuat keputusan untuk meminda tarikh peperiksaan awam, iaitu Sijil Pelajaran Malaysia (SPM), Sijil Vokasional Malaysia (SVM), Sijil Tinggi Agama Malaysia (STAM) dan Sijil Tinggi Persekolahan Malaysia (STPM) dengan mengambil kira pengajaran dan pembelajaran (PdP) yang terjejas sejak Perintah Kawalan Pergerakan (PKP) bermula pada bulan Mac hingga Jun 2020 dan Perintah Kawalan Pergerakan Bersyarat (PKPB) yang dilaksanakan di beberapa buah negeri selepas itu.

Untuk makluman Ahli Yang Berhormat, penjadualan semula peperiksaan awam tahun 2020 kepada suku pertama tahun 2021 adalah bagi membolehkan calon peperiksaan mempunyai tempoh masa pembelajaran yang lebih panjang untuk membuat persediaan rapi sebelum menghadapi peperiksaan tersebut. Selain daripada itu, ianya juga memberi lebih masa kepada mereka untuk mengikuti pembelajaran

secara bersemuka apabila sekolah dibuka semula. Penangguhan peperiksaan ini juga membolehkan KPM lebih bersedia untuk mengatur pelbagai aspek logistik berkaitan pelaksanaan peperiksaan.

Selain itu, calon SPM, SVM, STAM dan STPM tahun 2020 juga diberi keutamaan untuk memulakan persekolahan pada 20 Januari 2021 bagi membolehkan mereka mengikuti PdP secara bersemuka. Dengan ini, calon akan lebih bersedia untuk menghadapi peperiksaan serta mencapai prestasi yang terbaik mengikut kemampuan masing-masing. KPM yakin penjadualan semula semua peperiksaan awam ini tidak akan membebankan murid atau memberi kesan negatif kepada prestasi pencapaian murid dalam peperiksaan.

Dalam mendepani cabaran pada masa ini, KPM memohon kerjasama semua pihak, termasuk murid, guru dan ibu bapa untuk bersama-sama menyokong usaha-usaha yang dilaksanakan oleh kerajaan, khususnya KPM. Setiap langkah yang diatur KPM adalah bagi memastikan generasi masa depan negara mendapat pendidikan yang terbaik walaupun dalam keadaan yang sangat mencabar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK SERI SHAMSUL ISKANDAR @  
YUSRE BIN MOHD AKIN [HANG TUAH JAYA]**

**TARIKH : 1 DISEMBER 2020 (SELASA)**

**SOALAN**

**DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA ]** minta **MENTERI KEWANGAN** menyatakan apakah Kerajaan bersedia mempertimbangkan perlepasan cukai bagi individu untuk perbelanjaan kesihatan semasa pandemik COVID-19 seperti pembelian pelitup muka, cecair pembasmi kuman, makanan tambahan serta perkara-perkara lain yang berkaitan dalam usaha bersama untuk membantu mengekang penularan COVID-19.

**JAWAPAN**

**Tuan Yang Di-pertua,**

1. Untuk makluman Yang Berhormat, Kerajaan telah mengumumkan pelbagai pelepasan cukai bagi individu dan perusahaan kecil dan sederhana serta bantuan kewangan bagi menangani impak wabak COVID-19 kepada rakyat melalui Pakej Rangsangan Ekonomi , Pakej Rangsangan Ekonomi Prihatin dan Pakej Pelan Jana Semula Ekonomi Negara. Antaranya seperti berikut:-

- i. Pelepasan cukai ke atas perbelanjaan melancong sehingga RM1,000;
- ii. Pelepasan cukai ke atas pembelian komputer, tablet dan telefon bimbit sehingga RM2,500;



- iii. Pengecualian cukai ke atas perkuisit komputer riba, tablet dan telefon bimbit sehingga RM5,000;
- iv. Pelepasan cukai bagi yuran penghantaran anak ke taman asuhan atau didikan kanak-kanak dinaikkan sehingga RM3,000; dan
- v. Bantuan Kewangan kepada pekerja yang diberi cuti tanpa gaji oleh Majikan melalui Program Pengekalan Pekerjaan dan subsidi upah kepada majikan bagi membayar gaji pekerja melalui Program Subsidi Upah.

2. Dalam Belanjawan 2021 pula, Kerajaan telah mengumumkan peningkatan had kenaikan perbelanjaan rawatan perubatan untuk diri sendiri, pasangan dan anak daripada RM6,000 kepada RM8,000 dan diperluaskan skop rawatan kepada suntikan vaksinasi termasuk suntikan vaksin COVID-19 yang boleh dinikmati oleh pembayar cukai yang terlibat. Bagi menentukan bekalan pelitup muka sentiasa mencukupi dan harganya berpatutan, Kerajaan juga telah mengambil pendekatan melarang eksport serta mengawal harga produk berkenaan.

3. Langkah-langkah ini disediakan bagi meringankan bebanan kewangan yang dihadapi rakyat Malaysia sepanjang tempoh wabak COVID-19.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD [SHAH ALAM]**

**TARIKH : 1 DISEMBER 2020 [ SELASA ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan apakah status perkembangan Rang Undang-Undang Sewaan Kediaman yang kini amat diperlukan untuk melindungi hak dan membela penyewa yang kehilangan punca pendapatan daripada tindakan tidak wajar oleh pemilik rumah semasa pandemik COVID-19.

**JAWAPAN**

**Tuan Yang di-Pertua,**

1. Untuk makluman Yang Berhormat, Kementerian Perumahan dan Kerajaan Tempatan (KPKT) melalui Jabatan Perumahan Negara (JPN) telah memulakan kajian dan penggubalan Akta Sewaan Kediaman / *Residential Tenancy Act* (RTA) pada Jun 2019 melalui perunding yang telah dilantik. Pada masa ini, pihak perunding sedang menyiapkan Laporan Akhir Kajian bersama draf awal Rang Undang-Undang. KPKT akan mengadakan sesi libat urus bersama pemegang taruh (*stakeholders*) yang berkaitan industri perumahan dan sewaan untuk mendapatkan pandangan dan maklum balas berhubung cadangan akta ini sebelum dibawa untuk kelulusan Jemaah Menteri dan pembentangan di Parlimen.

2. Untuk makluman Yang Berhormat juga, Akta Sewaan Kediaman ini bertujuan untuk menangani isu-isu dan permasalahan sewaan kediaman dan membuat peruntukan perundangan berkaitan penyewaan melalui perjanjian yang seragam. Akta ini diharap dapat melindungi hak dan kepentingan kedua-dua pihak iaitu penyewa dan tuan rumah. Dengan adanya akta ini kelak, sebarang pertelingkahan di antara penyewa dan tuan rumah dapat diselesaikan melalui proses mediasi dan tribunal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 1 DISEMBER 2020**

**SOALAN**

Minta **MENTERI PENDIDIKAN** menyatakan pada keseluruhannya keadaan sekolah-sekolah di luar bandar termasuk Rompin, memerlukan kerja-kerja penyelenggaraan kerana sebahagian daripada sekolah tidak pernah mendapat kerja-kerja penyelenggaraan. Oleh itu, berapa peruntukkan Kementerian pada tahun ini untuk disalurkan kepada tujuan tersebut. Adakah Kementerian bercadang untuk menambah dan memohon bajet kerja-kerja penyelenggaraan.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik, untuk semua sekolah di seluruh negara. Ini adalah penting untuk memastikan pengajaran dan pembelajaran di sekolah dapat dilaksanakan dalam keadaan selamat dan selesa.

Bagi tahun 2020, keseluruhan peruntukan untuk tujuan penyelenggaraan sekolah dan institusi pendidikan di bawah pengendalian KPM adalah berjumlah RM570 juta. Khusus bagi Parlimen Rompin, terdapat 62 buah sekolah yang terdiri dari 42 Sekolah Rendah dan 20 Sekolah Menengah. Bagi tahun 2020, KPM telah memperuntukkan sebanyak RM3.92 juta bagi menyelenggara 31 buah sekolah di Parlimen Rompin.

Untuk makluman Ahli Yang Berhormat, setiap tahun KPM akan berusaha memohon peruntukan penyelenggaraan bagi sekolah dan institusi pendidikan mengikut keperluan untuk memastikan fasiliti bangunan dan kemudahan sekolah dalam keadaan baik demi keselamatan dan keselesaan warga sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN AHMAD FAHMI BIN MOHAMED FADZIL  
[LEMBAH PANTAI]**

**TARIKH : 1 DISEMBER 2020 (SELASA)**

**SOALAN**

**TUAN AHMAD FAHMI BIN MOHAMED FADZIL [ LEMBAH PANTAI ]** minta **MENTERI KEWANGAN** menyatakan jumlah peminjam individu dan syarikat yang telah mendapat moratorium bersasar sehingga hujung tahun, nilai moratorium tersebut, dan adakah Kerajaan berniat melanjutkannya jika pandemik COVID-19 masih berleluasa tahun hadapan.

**JAWAPAN**

**Tuan Yang Di-Pertua,**

1. Kerajaan telah memberikan moratorium ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara keseluruhan berakhir.
2. Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021.
3. Ekoran daripada gelombang ketiga COVID-19 baru-baru ini, Kerajaan juga telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000, akan turut menikmati bantuan yang serupa.
4. Peminjam dari golongan B40 diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

5. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

6. Seperti yang telah diumumkan dalam laporan LAKSANA, nilai yang dianggarkan untuk moratorium selama 6 bulan berjumlah kira-kira RM100 bilion, dengan RM35 bilion kepada PKS dan RM65 bilion kepada peminjam individu.

7. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

- a. 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
- b. 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

**Tuan Yang Di-Pertua,**

8. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN SYED SADDIQ  
BIN SYED ABDUL RAHMAN [MUAR]**

**TARIKH : 1 DISEMBER 2020 (SELASA)**

**SOALAN**

**TUAN SYED SADDIQ BIN SYED ABDUL RAHMAN [ MUAR ]** minta **MENTERI KEWANGAN** menyatakan mengapa golongan mahasiswa tidak layak menerima Bantuan Prihatin Nasional (BPN) 2.0 Khas Untuk Mahasiswa sedangkan mahasiswa juga adalah kumpulan besar yang terkesan akibat penularan wabak COVID-19.

**JAWAPAN**

Tuan Yang di-Pertua,

1. Bantuan Prihatin Nasional (BPN) 2.0 merupakan sebahagian daripada **Kerangka Inisiatif Tambahan, Pakej Rangsangan Ekonomi Prihatin Rakyat (KITA PRIHATIN)** bernilai RM10 bilion yang telah diumumkan oleh YAB Perdana Menteri pada 23 September 2020 lalu **yang keseluruhannya berjumlah RM7.0 bilion.**

2. YAB Perdana Menteri telah mengumumkan Pakej Rangsangan Ekonomi Prihatin Rakyat (PRIHATIN) yang meliputi bantuan secara *one-off* sebanyak RM200 khusus kepada pelajar Institusi Pendidikan Tinggi Awam (IPTA) dan Institut Pengajian Tinggi Swasta (IPTS) di bawah seliaan Kementerian Pengajian Tinggi. Bantuan tunai ini disalurkan terus kepada akaun bank pelajar yang didaftarkan dengan Institut Pengajian Tinggi (IPT) masing-masing dalam usaha membantu meringankan beban mereka yang terkesan akibat penularan wabak COVID-19.

3. Selain itu, bantuan kepada mahasiswa turut diberikan dalam bentuk pengurangan kadar yuran asrama dan yuran perkhidmatan/aktiviti sehingga 15%. Kerajaan juga turut menyediakan bantuan makanan sebanyak RM15 sehari bagi pelajar yang tidak dapat pulang ke kediaman masing-masing semasa pelaksanaan awal Perintah Kawalan Pergerakan (PKP). Inisiatif ePENJANA bernilai RM50 bagi rakyat Malaysia yang berumur 18 tahun dan ke atas juga telah memberi manfaat kepada golongan mahasiswa.

4. Bantuan kepada mahasiswa tidak terhad kepada bantuan tunai sahaja. Ianya turut dipanjangkan dalam bentuk yang lain seperti penambahbaikan capaian internet di IPT, pembangunan infrastruktur dan pinjaman pendidikan. Kerajaan akan kekal komited dalam memastikan mahasiswa dapat melalui pengalaman pembelajaran yang selesa dalam usaha melahirkan graduan yang berkualiti dan berketerampilan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN CHAN MING KAI [ALOR SETAR]**

**TARIKH : 1 DISEMBER 2020 (SELASA)**

**SOALAN**

**TUAN CHAN MING KAI [ ALOR SETAR ]** minta **MENTERI KEWANGAN** menyatakan jumlah pelepasan cukai pendapatan yang telah dituntut bagi insurans nyawa dan KWSP oleh kategori penjawat awam berpencen dan kategori selain penjawat awam berpencen serta jumlah pembayar cukai yang terlibat.

**JAWAPAN**

Tuan Yang Di-pertua,

1. Untuk makluman Yang Berhormat, jumlah tuntutan pelepasan cukai pendapatan bagi insurans nyawa dan KWSP oleh pembayar cukai kategori penjawat awam bertaraf berpencen adalah sebanyak RM2.4 bilion melibatkan 537,917 pembayar cukai bagi tahun taksiran 2019.
2. Bagi kategori selain penjawat awam berpencen pula, jumlah tuntutan pelepasan cukai bagi insurans nyawa dan KWSP adalah sebanyak RM9.8 bilion. Jumlah pembayar cukai bagi tahun taksiran 2019 ialah seramai 3.3 juta.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN SIM TZE TZIN [ BAYAN BARU ]**

**TARIKH : 1 DISEMBER 2020 (SELASA)**

**SOALAN**

**TUAN SIM TZE TZIN [ BAYAN BARU ]** minta **MENTERI KOMUNIKASI DAN MULTIMEDIA** menyatakan jumlah laman sosial seperti Facebook, twitter, website yang diturunkan atau diambil tindakan oleh MCMC akibat menyebarkan berita palsu politik dari tahun 2015 hingga Oktober 2020. Nyatakan mengikut tahun.

**JAWAPAN**

**Tuan Yang di-Pertua,**

Untuk makluman Ahli Yang Berhormat, pihak Kementerian akan meneruskan inisiatif kesedaran serta pengupayaan dan pendidikan pengguna atau “*user empowerment and education*” melalui pelbagai program advokasi dan kesedaran di media dan di lapangan sebagai kesinambungan kepada inisiatif sedia ada dalam usaha memupuk kesedaran awam mengenai gejala berita palsu, membudayakan amalan menyemak dan menentukan kesahihan sesuatu berita sebelum dikongsi atau disebarkan, serta membudayakan amalan menyebarkan kebenaran.

Pihak Kementerian atau pihak berautoriti pada ketika ini memainkan peranan aktif dalam mengesan dan memantau penularan berita/maklumat yang tidak benar yang timbul atau tular melibatkan perkara-perkara yang berada di dalam ruang lingkup pengawalseliaan serta bidang kuasa mereka, seterusnya mengeluarkan kenyataan menafikan sebarang berita palsu atau menjelaskan sebarang berita yang tidak tepat dan mengelirukan melibatkan isu atau perkara yang berada di dalam skop peranan, bidang tugas atau kepakaran khusus mereka. Kenyataan-kenyataan penafian atau penjelasan yang dibuat akan diterbitkan dalam portal Sebenarnya.my sebagai repositori kepada berita-berita yang telah ditentusahkan dan untuk menjadi sumber rujukan bagi orang ramai menentusahkan sesuatu berita yang tular.

Untuk makluman Ahli Yang Berhormat juga, penyedia-penyedia platform seperti *Facebook, Google, Twitter, WhatsApp, Telegram, Wechat* dan sebagainya adalah platform yang tidak berdaftar di Malaysia dan tidak tertakluk kepada undang-undang di Malaysia.

Tindakan yang dijalankan oleh pihak Suruhanjaya Komunikasi dan Multimedia Malaysia (SKMM) adalah lebih berupa rundingan dan permohonan kerjasama bagi mengambil tindakan sewajarnya termasuklah menurunkan kandungan berita palsu yang telah dimuatnaik, berdasarkan permintaan SKMM. Walau bagaimanapun,

tindakan yang diambil atau kerjasama yang diberikan adalah tertakluk kepada terma perkhidmatan serta piawaian komuniti penyedia platform-platform berkenaan yang berpangkalan di luar negara, yang mana piawaiannya digubal di peringkat global, yang tidak sama seperti nilai-nilai masyarakat majmuk di Malaysia.

Sejumlah **3,638** pautan (URL) bagi kandungan yang berunsur berita palsu, buli siber, kandungan berunsur kebencian, dan sebagainya telah dirujuk untuk perhatian dan tindakan lanjut penyedia platform media sosial seperti *Facebook, Twitter, Google, Instagram, YouTube* dan sebagainya, dan **60%** daripadanya telah dipadamkan berdasarkan pelanggaran terma dan syarat perkhidmatan serta piawaian komuniti penyedia platform yang berkenaan.

Pihak penyedia platform media sosial seperti *Facebook* juga turut memantau kandungan serta akaun yang terdapat di platform mereka, dan akan mengambil tindakan sewajarnya sekiranya kandungan atau akaun yang dimuatnaik bertentangan dengan terma dan syarat serta piawaian komuniti yang ditetapkan oleh pihak mereka.

Sebagai contoh, dari tahun 2018 sehingga suku kedua tahun 2020, Facebook dilaporkan secara proaktif telah menyahaktifkan lebih **13.037 bilion** akaun palsu secara global, yang mana 99.6% daripadanya dilaksanakan sebelum sebarang laporan dibuat oleh pengguna.

Pihak Kerajaan melalui PDRM dan Suruhanjaya Komunikasi dan Multimedia (SKMM) sangat komited dalam perkara menangani penyebaran berita palsu, di mana tindakan tegas akan diambil ke atas mana-mana pihak yang tidak bertanggungjawab menyebarkan kandungan, khabar angin atau berita yang tidak sahih, tanpa mengira latar belakang politik.

SKMM juga menjalankan siasatan berdasarkan aduan atau laporan polis yang diterima, dan tindakan boleh diambil berdasarkan lunas-lunas undang-undang sedia ada termasuk di bawah Kanun Keseksaan dan Akta Komunikasi dan Multimedia 1998 ('AKM 1998').

**SOALAN NO : 37**

Untuk makluman Ahli Yang Berhormat, antara tahun 2015 sehingga September 2020, sejumlah **185** kes telah disiasat oleh pihak SKMM berhubung penyebaran berita palsu, dan **16** daripadanya telah dihadapkan ke mahkamah dengan **19** pertuduhan, **3** kes telah dikompaun dan **24** kes telah diberikan surat amaran.

\*STATISTIK TINDAKAN SIASATAN TERHADAP PENYEBARAN BERITA PALSU MENGIKUT TAHUN

| <b>Perkara</b>           | <b>2015</b> | <b>2016</b> | <b>2017</b> | <b>2018</b> | <b>2019</b> | <b>2020</b> | <b>Jumlah</b> |
|--------------------------|-------------|-------------|-------------|-------------|-------------|-------------|---------------|
| <b>Bil kes disiasat</b>  | 11          | 25          | 28          | 38          | 18          | 65          | 185           |
| <b>Bil kes didakwa</b>   | -           | 2           | 7           | 0           | 1           | 6           | 16            |
| <b>Bil Pertuduhan</b>    | -           | 4           | 7           | -           | 2           | 6           | 19            |
| <b>Bil kes dikompaun</b> | -           | 1           | 2           | -           | -           | -           | 3             |
| <b>Bil surat amaran</b>  | -           | 1           | 12          | --          | -           | 11          | 24            |

Pihak SKMM dan PDRM akan terus aktif mengambil tindakan terhadap mereka yang gemar mencipta dan menyebarkan berita palsu selaras laporan polis dan aduan awam yang diterima, terutamanya bilamana melibatkan berita palsu yang menghadirkan kebimbangan dalam kalangan masyarakat.

Walau bagaimanapun, rakyat harus sedar bahawa berita palsu akan terus tersebar selagi adanya 'permintaan' dalam kalangan masyarakat. Sekiranya rakyat sedar maklumat diterima adalah mencurigakan atau palsu, seterusnya tidak membaca atau berkongsikan maklumat tersebut, berita itu pasti tidak akan ke mana-mana, dan rantai berita palsu akan diputuskan. Namun, perkara ini tidak dapat dilaksanakan dalam masa yang singkat, kerana ia melibatkan perubahan nilai-nilai masyarakat.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SU KEONG SIONG [ KAMPAR ]**

**TARIKH : 1 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan penilaian Kementerian mengenai kesan perubahan cara pendidikan disampaikan di sekolah terhadap murid-murid dari segi kemampuan belajar, kesihatan mental dan kepuasan terhadap persekolahan mereka memandangkan tempoh persekolahan telah dipendekkan manakala kurikulum masih dikekalkan akibat pandemik wabak COVID-19.

**JAWAPAN**

**Tuan Yang di-Pertua,**

Pandemik COVID-19 memberi kesan yang cukup mendalam kepada seluruh rakyat. Khusus bagi sektor pendidikan, sekolah terpaksa ditutup dan menyebabkan sesi pengajaran dan pembelajaran (PdP) secara bersemuka menjadi lebih singkat. Kementerian Pendidikan Malaysia (KPM) sentiasa berusaha untuk memastikan PdP terus dilaksanakan agar semua murid tidak ketinggalan dan dapat mengikuti pembelajaran dalam keadaan selamat.

Dalam tempoh sekolah ditutup, KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid. Apabila sekolah dibuka semula mulai 24 Jun 2020, murid dapat kembali berpeluang mengikuti pembelajaran secara bersemuka di sekolah. Namun masih ada



sebahagian murid yang mengikuti PdP secara *Home-based Learning*, khususnya bagi sekolah yang melaksanakan modul penggiliran.

Bagi memantapkan pelaksanaan *Home-based Learning*, Manual Pengajaran dan Pembelajaran di Rumah (PdPR) disediakan sebagai panduan kepada guru dalam melaksanakan PdPR secara berstruktur dan terancang supaya murid dapat mengikuti pembelajaran di rumah secara optimum. Manual PdPR ini meliputi pelbagai kaedah PdP yang dapat dilakukan dari rumah seperti dalam talian (*online*), luar talian (*offline*) atau *off-site*. Secara keseluruhan, guru mentaksir murid secara berterusan mengikut kesesuaian dan merancang melaksanakan intervensi mengikut tahap dan keupayaan murid.

Untuk makluman Ahli Yang Berhormat, bagi murid yang mempunyai peranti serta akses internet di rumah, KPM menyediakan kemudahan pembelajaran dalam talian melalui beberapa platform. Antaranya, pelantar pembelajaran Digital Educational Learning Initiative Malaysia (DELIMa) dan video pendidikan dalam portal EduwebTV serta video pendidikan yang dikongsikan oleh guru-guru dalam portal Cikgootube.

Manakala, bagi murid yang tidak mempunyai akses internet atau peranti yang sesuai untuk pembelajaran secara dalam talian, guru mengambil inisiatif melaksanakan PdP melalui serahan bahan pembelajaran kepada murid mengikut kesesuaian. Murid juga boleh menggunakan buku teks cetak sebagai bahan rujukan, penyediaan nota, membuat rumusan atau melukis sesuatu konsep. Selain daripada itu, PdP turut dilaksanakan melalui siaran TV Pendidikan dengan mengambil inisiatif memperkenalkan semula TV Pendidikan secara terrestrial bermula pada 6 April 2020. Keseluruhan waktu siaran TV Pendidikan di TV Okey RTM, Tutor TV Astro dan NTV7 adalah selama sembilan (9) jam sehari.

Setelah sekolah dibuka semula secara berperingkat, murid dapat kembali berpeluang mengikuti pembelajaran secara bersemuka dan berinteraksi dengan guru. Namun, situasi ini tidak berpanjangan kerana semua sekolah terpaksa ditutup semula mulai 9 November 2020 berikutan gelombang ketiga pandemik COVID-19. Dalam situasi kali ini, murid dan guru lebih bersedia untuk melaksanakan PdP di rumah kerana

mereka telah mempunyai pengalaman semasa PKP sebelum ini. Segala usaha yang dilaksanakan ini jelas menunjukkan pihak sekolah serta guru begitu komited dan telah berusaha bersungguh-sungguh dalam melaksanakan tanggungjawab untuk memastikan murid tidak ketinggalan dalam mengikuti pembelajaran

**Tuan Yang di-Pertua,**

KPM menyedari bahawa sesi persekolahan tahun ini turut memberi kesan kepada psikologi mental murid. Oleh itu, sepanjang tempoh sekolah ditutup, murid boleh berhubung dengan Guru Bimbingan dan Kaunseling di sekolah jika memerlukan bimbingan dan nasihat. Antara kaedah yang boleh digunakan ialah melalui tele-kaunseling, panggilan telefon dan aplikasi WhatsApp. Selain itu, video pendek dan infografik disediakan sebagai rujukan untuk murid.

Untuk makluman Ahli Yang Berhormat, KPM sedang mengumpul maklumat mengenai kesan persekolahan dan pelaksanaan pembelajaran dalam talian terhadap kesejahteraan emosi murid. Ini akan menjadi panduan kepada KPM untuk merangka pendekatan dan bentuk sokongan psiko-sosial terhadap kesejahteraan mental murid kesan daripada perubahan kaedah pembelajaran akibat pandemik COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN WONG CHEN [SUBANG]**

**TARIKH : 1 DISEMBER 2020 (SELASA)**

**SOALAN**

**TUAN WONG CHEN [ SUBANG ]** minta **MENTERI KEWANGAN** menyatakan data dan maklum balas terkini dari pihak bank dan institusi kewangan mengenai penamatan moratorium pinjaman sejak 1 Oktober 2020, khususnya mengenai perkara-perkara mengenai prestasi pembayaran balik pinjaman.

**JAWAPAN**

**Tuan Yang Di-Pertua,**

1. Mengikut statistik BNM, pada bulan September semasa tempoh moratorium secara menyeluruh masih lagi berkuat kuasa, nilai keseluruhan bayaran balik pinjaman telah mencecah 70% daripada jumlah sebelum tempoh moratorium pinjaman secara menyeluruh. Ini menunjukkan bahawa ramai peminjam tidak memerlukan bantuan bayaran balik pinjaman buat masa ini.
2. Data bayaran balik pinjaman untuk bulan Oktober sedang dikumpul. Berdasarkan laporan awal daripada bank, sebahagian besar peminjam telah mula menyambung semula bayaran ansuran mengikut jadual. Sebagai contoh, bank telah mengumumkan bahawa kira-kira 85% daripada peminjam telah menyambung semula bayaran balik pinjaman mereka pada bulan Oktober. Peminjam yang belum membayar balik ansuran pinjaman merupakan peminjam yang telah memohon untuk menangguhkan bayaran balik pinjaman mereka dan peminjam

yang masih perlu menghubungi bank bagi mendapatkan bantuan bayaran balik pinjaman.

3. Perkara yang perlu ditekankan ialah sebahagian besar peminjam berupaya untuk menyambung semula bayaran ansuran mereka dan dengan berbuat demikian mereka boleh mengurangkan kos pinjaman keseluruhan. Apabila lebih banyak individu yang mampu membayar balik pinjaman mula menyambung semula bayaran balik pinjaman mereka, maka bank boleh menumpukan sumber dan perhatian mereka kepada peminjam yang terjejas akibat COVID-19.

4. Ekoran daripada gelombang ketiga COVID-19 baru-baru ini, Kerajaan juga telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000, akan turut menikmati bantuan yang serupa.

5. Peminjam dari golongan B40 diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

6. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

**Tuan Yang Di-Pertua,**

7. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

- a. 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
- b. 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

8. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Bagi mereka yang menghadapi kesukaran untuk membayar balik pinjaman, hubungi bank anda untuk membuat permohonan. Bank akan terus menawarkan bantuan bayaran balik pinjaman secara bersasar kepada mereka yang terjejas akibat COVID-19 sepanjang tahun 2020 sehingga 2021.

**MESYUARAT KETIGA, PENGGAL KETIGA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : DATUK IGNATIUS DARELL LEIKING  
[ PENAMPANG ]**

**TARIKH : 1 DISEMBER 2020 (SELASA)**

**SOALAN**

minta **MENTERI PEMBANGUNAN LUAR BANDAR** menyatakan status naik taraf Jalan Terian, Penampang, Sabah yang berjumlah RM102 Juta seperti senarai projek RP4 RMK-11 untuk P.174 Penampang yang diumumkan oleh Jabatan Perdana Menteri pada 18 Februari 2019.

**JAWAPAN**

**Tuan Yang di-Pertua,**

Untuk makluman Yang Berhormat, Projek Naiktaraf Jalan Terian, Penampang, Sabah telah diluluskan di bawah Rancangan Malaysia Kesebelas, *Rolling Plan* keempat (RMKe-11, RP4) Tahun 2019 dengan kos sebanyak RM102 juta dengan skop naiktaraf jalan sepanjang 17km dengan spesifikasi JKR R2. Status projek kini adalah di peringkat lantikan perunding. Jangkaan pelaksanaan projek adalah pada November 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN CHA KEE CHIN [RASAH]**

**TARIKH : 1 DISEMBER 2020 (SELASA)**

**SOALAN**

**TUAN CHA KEE CHIN [ RASAH ]** minta **MENTERI KEWANGAN** menyatakan berapakah nilai keseluruhan yang terlibat ketika pelaksanaan moratorium dari April hingga September 2020 dan nilai moratorium bersasar yang bermula Oktober 2020, dan apakah keberkesanan moratorium bersasar yang dilaksanakan sekarang dalam membantu rakyat yang terkesan kerana pandemik COVID-19.

**JAWAPAN**

**Tuan Yang Di-Pertua,**

1. Kerajaan telah memberikan moratorium ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara keseluruhan berakhir.
2. Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021.
3. Ekoran daripada gelombang ketiga COVID-19 baru-baru ini, Kerajaan juga telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000, turut akan menikmati bantuan yang serupa.
4. Peminjam dari golongan B40 diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).



5. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

6. Seperti yang telah diumumkan dalam laporan LAKSANA, nilai yang dianggarkan untuk moratorium selama 6 bulan berjumlah kira-kira RM100 bilion, dengan RM35 bilion kepada PKS dan RM65 bilion kepada peminjam individu.

7. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

- a. 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
- b. 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

**Tuan Yang Di-Pertua,**

8. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DR. KELVIN YII LEE WUEN  
[BANDAR KUCHING]**

**TARIKH : 1 DISEMBER 2020 (SELASA)**

**SOALAN**

**DR. KELVIN YII LEE WUEN [ BANDAR KUCHING ]** minta **MENTERI KEWANGAN** menyatakan adakah Kementerian bercadang untuk melanjutkan moratorium bank untuk menolong rakyat yang semakin terkesan disebabkan pandemik ini termasuk gelombang ketiga COVID-19 yang berlaku baru-baru ini.

**JAWAPAN**

**Tuan Yang Di-Pertua,**

1. Kerajaan telah memberikan moratorium ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara keseluruhan berakhir.
2. Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021.

3. Ekoran daripada gelombang ketiga COVID-19 baru-baru ini, Kerajaan juga telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000, turut akan menikmati bantuan yang serupa.

4. Peminjam dari golongan B40 akan diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

**Tuan Yang Di-Pertua,**

5. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

6. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 01 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan status terkini pembinaan SJK(T) HEAWOOD. Mengikut kontrak sepatutnya ianya siap pada 5 Disember 2019.

**JAWAPAN**

**Tuan Yang di-Pertua,**

Projek Pembinaan Sekolah Jenis Kebangsaan Tamil Heawood, Sungai Siput (U), Perak telah diluluskan dalam *Rolling Plan* 1 (Tahun 2016) Rancangan Malaysia Ke-11 (RMKe-11) dengan kos projek berjumlah RM13.88 juta. Skop projek ini meliputi pembinaan baharu 12 bilik darjah dan kemudahan lain. Projek ini adalah di bawah seliaan Kementerian Pendidikan Malaysia (KPM).

Untuk makluman Ahli Yang Berhormat, projek pembinaan sekolah ini telah dimulakan pada Jun 2017 dan sepatutnya siap pada 23 Mac 2019, iaitu setelah mendapat kelulusan Lanjutan Tempoh Masa (EOT) sebanyak 108 hari dari tarikh siap asal pada 5 Disember 2018. Walau bagaimanapun, kontraktor gagal menunjukkan sebarang peningkatan prestasi kerja di tapak projek selepas KPM memberikan peluang selama empat bulan melalui Notis Tujuan Penamatan pada 2 April 2019. Susulan itu, kontraktor bagi projek ini telah ditamatkan pada 20 Ogos 2019.

Semasa penamatan dibuat, progres terakhir kerja-kerja pembinaan adalah sebanyak 42% berbanding jadual 100%. KPM sedang dalam proses penyediaan dokumen tender dan akan ditender semula pada Januari tahun 2021. Sekolah ini dijangka akan siap dibina pada tahun 2022.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK SERI DR. HAJI DZULKEFLY  
BIN AHMAD [KUALA SELANGOR]**

**TARIKH : 1 DISEMBER 2020 (SELASA)**

**SOALAN**

**DATUK SERI DR. HAJI DZULKEFLN AHMAD [ KUALA SELANGOR ]** minta **MENTERI KEWANGAN** menyatakan apakah asas-asas pertimbangan unjuran Lapan peratus pertumbuhan Keluaran Dalam Negara Kasar yang diumumkan Kerajaan baru-baru ini.

**JAWAPAN**

**Tuan Yang di-Pertua,**

1. Kerajaan telah mengambil keputusan tegas untuk memberi keutamaan kepada usaha menyelamatkan nyawa dan melindungi kehidupan rakyat melalui pelaksanaan beberapa fasa Perintah Kawalan Pergerakan (PKP) untuk membendung penularan pandemik COVID-19 meskipun menyedari impak pelaksanaan tersebut kepada ekonomi negara. Bagi melindungi kehidupan rakyat dan menyokong pertumbuhan ekonomi, Kerajaan telah melaksanakan beberapa pakej rangsangan dan pelan pemulihan ekonomi bernilai RM305 bilion. Pelaksanaan pakej rangsangan tersebut dan pembukaan semula ekonomi secara beransur-ansur mulai Mei 2020 telah memberi impak positif terhadap aktiviti ekonomi. Ini dapat dilihat melalui penguncupan ekonomi yang berkurangan daripada 28.6 peratus pada bulan April 2020 kepada 3.2 peratus pada bulan Jun dan 1.6 peratus pada bulan September.

2. Mengambil kira faktor global dan domestik di samping kesan limpahan daripada pelbagai pakej rangsangan dan langkah Belanjawan 2021 yang telah diumumkan, Kerajaan telah mengunjurkan pertumbuhan ekonomi negara kembali pulih antara 6.5 peratus hingga 7.5 peratus pada tahun 2021. Unjuran berkenaan adalah sejajar dengan jangkaan pemulihan ekonomi global dan perdagangan antarabangsa. Malah, keupayaan ekonomi Malaysia untuk kembali melonjak pada 2021 turut diiktiraf oleh beberapa badan antarabangsa seperti Tabung Kewangan Antarabangsa, Bank Dunia dan Bank Pembangunan Asia dengan unjuran dalam julat yang serupa. Pada masa yang sama, pembaharuan struktur ekonomi, kewangan dan fiskal yang dilaksanakan selama ini telah menyediakan penampan yang mencukupi untuk Malaysia bertahan dalam menangani cabaran luar. Struktur ekonomi yang kini lebih pelbagai serta disokong oleh asas ekonomi yang meluas; sistem kewangan yang berdaya tahan dan maju; dan struktur perdagangan yang pelbagai dari segi pasaran eksport dan produk serta kadar pertukaran yang fleksibel terus mendokong aktiviti ekonomi domestik.

3. Walau bagaimanapun, prospek pertumbuhan ekonomi negara pada 2021 banyak bergantung kepada sejauh mana tahap penularan pandemik COVID-19 di peringkat global dan domestik serta penemuan vaksin dalam masa terdekat. Sekiranya krisis COVID-19 berpanjangan, Kerajaan akan membuat penyesuaian semula kepada belanjawan dan mengenalpasti penjimatan untuk disalurkan kepada program atau aktiviti berdasarkan keutamaan dan keperluan untuk merangsang ekonomi.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN CHA KEE CHIN [RASAH]**

**TARIKH : 1 DISEMBER 2020 (SELASA)**

**SOALAN**

**TUAN CHA KEE CHIN [ RASAH ]** minta **MENTERI KEWANGAN** menyatakan sama ada RM20 juta yang diperuntukkan untuk pembinaan bangunan baru Sekolah Jenis Kebangsaan Cina (SJKC) ketika Pakatan Harapan menjadi Kerajaan masih diperuntukkan untuk tujuan yang sama dan apakah kaedah pengagihan serta senaraikan sekolah yang mendapat peruntukan ini.

**JAWAPAN**

**Tuan Yang di-Pertua,**

1. Untuk makluman Ahli Dewan, peruntukan RM20 juta bagi tujuan pembinaan dan perpindahan Sekolah Jenis Kebangsaan Cina [SJK(C)] masih diteruskan dan peruntukan tersebut telah diluluskan kepada Kementerian Pendidikan Malaysia (KPM) pada 27 Julai 2020. Manakala agihan peruntukan ditetapkan oleh KPM kepada sekolah-sekolah yang layak.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AKMAL NASRULLAH  
BIN MOHD NASIR [JOHOR BAHRU]**

**TARIKH : 1 DISEMBER 2020 [ SELASA ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan usaha Kementerian untuk membantu pemilik-pemilik rumah yang tidak mampu membayar ansuran bulanan kepada pihak bank akibat penamatan moratorium oleh Kerajaan.

**JAWAPAN**

**Tuan Yang di-Pertua,**

1. Untuk makluman Yang Berhormat, Kementerian Perumahan dan Kerajaan Tempatan (KPKT) memahami dan mengambil maklum berhubung isu pemilik rumah yang tidak mampu membayar ansuran bulanan disebabkan oleh kehilangan punca pendapatan akibat
2. yang memerlukan bantuan hanya perlu pandemik COVID-19.
3. Kerajaan Persekutuan akan terus memberikan bantuan meskipun moratorium secara keseluruhan telah berakhir. Dengan peralihan kepada bantuan bayaran balik pinjaman secara bersasar pada 1 Oktober 2020, bank-bank terus menawarkan pelanjutan moratorium dan bentuk fleksibiliti bayaran balik pinjaman lain kepada mereka yang terjejas akibat COVID-19. Bantuan ini disediakan kepada mereka yang telah kehilangan pekerjaan atau pendapatan mereka terjejas, sama ada individu, isi rumah atau Pengusaha Kecil dan Sederhana (PKS) sepanjang tahun 2020 sehingga tahun 2021.
4. Selain itu, ekoran daripada gelombang ketiga COVID-19 baru-baru ini, Kerajaan telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang merupakan penerima Bantuan Sara Hidup/ Bantuan Prihatin Rakyat dan perusahaan mikro dengan pinjaman berjumlah sehingga RM150,000. Peminjam boleh menangguhkan bayaran balik pinjaman selama tiga bulan atau mengurangkan bayaran ansuran bulanan sebanyak 50% untuk 6 bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

5. Setakat ini, sekitar 650,000 peminjam telah memohon bantuan dan kira-kira 98% permohonan telah diluluskan. Untuk makluman selanjutnya, sebanyak 40% daripada peminjam yang memohon pelanjutan moratorium manakala 60% memilih untuk menyambung semula bayaran balik pinjaman tetapi dengan kadar yang lebih rendah. Bagi peminjam yang meneruskan bayaran balik pinjaman, kos pinjaman keseluruhan akan menjadi lebih rendah berbanding jika mereka menangguhkan bayaran balik pinjaman. Menurut bank-bank, sekitar 85% daripada peminjam telah menyambung semula bayaran balik pinjaman tanpa apa-apa bantuan pada bulan Oktober.

6. Bagi memastikan bantuan dapat diberikan dengan segera kepada mereka yang memerlukan, proses permohonan telah dipermudahkan dan diringkaskan. Pada umumnya, bank-bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank-bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN P. PRABAKARAN [ BATU ]**

**TARIKH : 1 DISEMBER 2020 (SELASA)**

**SOALAN**

**TUAN P. PRABAKARAN [ BATU ]** minta **MENTERI KOMUNIKASI DAN MULTIMEDIA** menyatakan apakah inisiatif yang akan diambil bagi menangani kumpulan scam di atas talian. Adakah kementerian berhasrat untuk memperketatkan akta bagi badan-badan yang mempunyai data maklumat peribadi seperti syarikat-syarikat telco dan sebagainya.

**JAWAPAN**

**Tuan Yang di-Pertua,**

Untuk makluman Ahli Yang Berhormat, kegiatan penipuan ataupun 'scam' sama ada secara dalam talian (*online*) ataupun luar talian (*offline*) adalah tertakluk di bawah bidang kuasa pihak Polis Diraja Malaysia (PDRM), Kementerian Perdagangan Dalam Negeri dan Hal Ehwal Pengguna (KPDNHEP), Suruhanjaya Sekuriti (SC), Bank Negara Malaysia (BNM) atau agensi-agensi berkenaan; tertakluk kepada bentuk-bentuk penipuan yang dijalankan.

Di pihak Suruhanjaya Komunikasi dan Multimedia Malaysia (SKMM), daripada tahun 2018 hingga September 2020, pihak SKMM telah menerima sejumlah **3,595** aduan awam berkaitan aktiviti berunsur penipuan, yang seterusnya dirujuk kepada agensi-agensi penguatkuasaan yang berkaitan seperti pihak PDRM, KPDNHEP, SC

atau BNM untuk perhatian dan tindakan lanjut di bawah bidang kuasa mereka.

Dalam tempoh yang sama, **1,588** laman palsu yang dikenali sebagai laman “Phishing” telah disekat di bawah AKM 1998 melalui usahasama pemantauan institusi-institusi perbankan yang terlibat dalam Internet Banking Task Force (IBTF) yang diketuai oleh Bank Negara Malaysia.

Bagi perkara berkaitan siasatan, “Jawatankuasa Jenayah Siber” yang telah ditubuhkan akan terus digerakkan dan diperkasakan bagi menerajui gerak kerja dan tindakan yang lebih strategik dan tersusun antara PDRM dan SKMM, termasuklah bagi perkara-perkara yang melibatkan isu kesalahan jenayah siber termasuklah berkaitan penipuan atau *scam*. Kerjasama dan kolaborasi antara kedua-dua pihak khususnya dalam perkongsian maklumat dan kepakaran adalah bertepatan bagi melancarkan aktiviti penguatkuasaan dalam menangani isu penyalahgunaan media sosial dengan lebih efektif. Bagi aduan yang tidak dapat dikendalikan di peringkat SKMM, ianya akan dibawa kepada perbincangan bersama agensi-agensi lain.

Daripada aspek pengawalseliaan industri, SKMM turut menjalankan audit pengesahan data dengan Jabatan Pendaftaran Negara (JPN) untuk mengesahkan integriti pangkalan data pelanggan talian telefon prabayar untuk memastikan bahawa semua nombor yang aktif disahkan dengan sewajarnya. Ini bagi mengelakkan ianya disalahguna oleh pihak yang tidak bertanggungjawab untuk tujuan penipuan dan seumpamanya.

Sehingga Oktober 2020, sebanyak 1,377,862 talian prabayar yang didaftar secara meragukan telah dikesan. Daripada jumlah tersebut, sebanyak 920,217 talian telah ditamatkan perkhidmatannya dan 457,645 telah dikemaskini dengan maklumat yang sah.

Selain daripada tindakan berbentuk penguatkuasaan dan pengawalseliaan industri, pihak Kementerian turut memberi keutamaan terhadap usaha meningkatkan kesedaran orang ramai berhubung

penipuan dalam talian. Bagi tujuan tersebut, pihak SKMM menggerakkan program-program advokasi pengguna menerusi kempen-kempen kesedaran di seluruh negara, serta melalui hebahan media massa bagi memupuk kesedaran dan kewaspadaan orang ramai termasuk golongan muda dan kanak-kanak berkenaan risiko dan modus operandi penipuan dalam talian.

KKMM juga turut memberi kerjasama dengan mengaturkan siri temu bual di rancangan bual bicara di televisyen (TV), radio mahupun sesi webinar yang menampilkan wakil daripada BNM, PDRM dan SKMM.

Di samping itu juga, Kementerian melalui Jabatan Perlindungan Data Peribadi (JPDP) telah menguatkuasakan Akta Perlindungan Data Peribadi 2010 (Akta 709) pada 15 November 2013 yang bertujuan untuk mengawalselia pemprosesan data peribadi individu yang terlibat dalam urusan niaga komersial oleh Pengguna Data supaya tidak disalahguna dan disalahpakai oleh pihak-pihak yang berkepentingan.

Setiap Pengguna Data wajib mematuhi 7 Prinsip Perlindungan Data Peribadi (Prinsip PDP) dalam mengendalikan data peribadi milik pelanggan mahu pun pekerja bagi memastikan data peribadi tersebut tidak disalahgunakan.

Justeru, Kementerian berpandangan bahawa pemakaian Akta 709 bagi maksud pengawalselia pemprosesan data peribadi dalam transaksi komersial oleh pengguna data seperti syarikat telco adalah mencukupi dalam memastikan data peribadi yang berada di bawah kawalannya dikendalikan dengan secara berhemah dan penuh integriti.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HAJI WAN HASSAN BIN MOHD RAMLI  
[ DUNGUN ]**

**TARIKH : 1 DISEMBER 2020 (SELASA)**

**SOALAN**

Minta **MENTERI PENDIDIKAN** menyatakan berkaitan pemantauan dan penyelenggaraan terhadap infrastruktur dan kemudahan air serta sistem kumbahan di Sekolah Menengah Kebangsaan Agama Kuala Abang (SMKAKA) Dungun Terengganu.

**JAWAPAN**

Tuan Yang di-Pertua,

Kementerian Pendidikan Malaysia komited dalam menyediakan kemudahan infrastruktur sekolah yang selamat dan selesa untuk diguna oleh warga sekolah. Sehubungan itu, pada tahun 2020 sebanyak RM20.74 juta telah diperuntukkan kepada Jabatan Pendidikan Negeri Terengganu bagi tujuan penyelenggaraan untuk 505 buah sekolah.

Daripada jumlah peruntukan tersebut, sebanyak RM2.57 juta telah disalurkan kepada 65 buah sekolah di Parlimen Dungun, termasuk peruntukan untuk penyelenggaraan Sekolah Menengah Kebangsaan Agama Kuala Abang (SMKAKA). Sekolah berkenaan menerima peruntukan berjumlah RM100,000.00 bagi kerja-kerja penyelenggaraan bumbung, tingkap, paip air dapur asrama, saluran air hujan dan salur tegak hujan, sistem kebakaran, panel kawalan, hose *ree*/ serta sistem dapur. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK SERI PANGLIMA ABDUL AZEEZ  
BIN ABDUL RAHIM [BALING]**

**TARIKH : 01 DISEMBER 2020 (SELASA)**

**SOALAN**

**DATUK SERI PANGLIMA ABDUL AZEEZ BIN ABDUL RAHIM  
[ BALING ]** minta **MENTERI KEWANGAN** menyatakan apakah pendirian Kerajaan terhadap tindakan UEM Sunrise (66% milik Khazanah Nasional) yang bercadang untuk membeli (bail-out) Eco World Development Group Berhad sedangkan syarikat tersebut sedang mengalami masalah kewangan yang tenat dan apakah manfaat yang akan diterima oleh Kerajaan dan rakyat jika urusan ini dibenarkan.



**JAWAPAN**

1. Tuan Yang Dipertua, cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.
2. Cadangan tersebut telah dikemukakan berdasarkan kepada manfaat komersial yang mampu diraih hasil daripada penggabungan tersebut. Cadangan penggabungan ini tidak disifatkan sebagai *bailout* memandangkan ia tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.
3. Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.
4. Sebarang keputusan yang berkaitan dengan cadangan penggabungan ini adalah bersifat komersial dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' SERI DR. WAN AZIZAH WAN ISMAIL  
[PANDAN]**

**TARIKH : 1 DISEMBER 2020 (SELASA)**

**SOALAN**

**DATO' SERI DR. WAN AZIZAH WAN ISMAIL [ PANDAN ]** minta **MENTERI KEWANGAN** menyatakan rasional cadangan UEM Group bagi penggabungan UEM Sunrise dengan EcoWorld, bagaimana nisbah pertukaran saham dan waran dicapai, dan komitmen bahawa wakil Khazanah akan menerajui entiti yang digabungkan ini memandangkan CEO UEM Sunrise sudah meletak jawatan.

**JAWAPAN**

1. Tuan Yang Dipertua, cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut. Cadangan berhubung perkara ini telah dikemukakan berdasarkan kepada manfaat komersial yang mampu diraih hasil daripada penggabungan tersebut.
2. Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld sekiranya kedua-dua syarikat ini bersetuju untuk memulakan perbincangan penggabungan selanjutnya.
3. Selain itu, cadangan penggabungan ini adalah tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.
4. Sebarang keputusan yang berkaitan dengan cadangan penggabungan ini adalah bersifat komersial dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN OSCAR LING CHAI YEW [SIBU]**

**TARIKH : 01 DISEMBER 2020 (SELASA)**

**SOALAN**

**TUAN OSCAR LING CHAI YEW [ SIBU ]** minta **MENTERI KEWANGAN** menyatakan sama ada Kerajaan Persekutuan akan membantu syarikat penerbangan seperti MAS dan AirAsia, bagaimana status kewangan terkini untuk Malaysia Airline. Adakah Kerajaan akan biarkan ia muflis.

**JAWAPAN**

1. Tuan Yang Dipertua, selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).
2. Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.
3. Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion. Prestasi kewangan MAGB antara tahun 2015 hingga 2018 adalah seperti berikut:-

| <b>Tahun</b> | <b>Keuntungan/ (Kerugian) - RM</b> |
|--------------|------------------------------------|
| 2015         | (1.1b)                             |
| 2016         | (0.7b)                             |
| 2017         | (1.2b)                             |
| 2018         | (1.3 b)                            |

4. Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.
5. Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini

beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

6. Walau bagaimanapun, Kerajaan komited untuk membantu semua pihak yang terjejas dengan penularan wabak COVID-19 termasuk sektor penerbangan dan pengangkutan udara. Walau bagaimanapun, pada masa ini, Kerajaan tidak terlibat dalam apa-apa pelan menyelamatkan (*bail out*) mana-mana syarikat penerbangan komersial termasuk memberi pinjaman atau jaminan kepada Air Asia selaras dengan kenyataan akhbar yang dikeluarkan oleh Kementerian Kewangan pada 13 Oktober 2020.

7. Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut. Proses penstrukturan semula turut melibatkan perundingan dengan pihak pemiutang dan pajakan pesawat.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN LIM LIP ENG [KEPONG]**

**TARIKH : 1 DISEMBER 2020 (SELASA)**

**SOALAN**

**TUAN LIM LIP ENG [ KEPONG ]** minta **MENTERI KEWANGAN** menyatakan adakah cadangan penggabungan UEM Sunrise Bhd dengan Eco World Development Group Bhd menerusi pertukaran saham dan waran telah mendapat persetujuan jemaah Menteri dan penjelasan secara teliti bagaimana cadangan tersebut akan menguntungkan Khazanah Nasional Bhd.

**JAWAPAN**

1. Tuan Yang Dipertua, cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.
2. Cadangan tersebut telah dikemukakan berdasarkan kepada manfaat komersial yang mampu diraih hasil daripada penggabungan tersebut. Cadangan penggabungan UEM Sunrise Bhd dengan Eco World Development Group Bhd menerusi pertukaran saham tidak memerlukan persetujuan Jemaah Menteri memandangkan ia adalah hal berkaitan operasi Syarikat, yang hanya memerlukan persetujuan Lembaga Pengarah syarikat masing-masing.
3. Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld sekiranya kedua-dua syarikat ini bersetuju untuk memulakan perbincangan penggabungan selanjutnya.
4. Sebarang keputusan yang berkaitan dengan cadangan penggabungan ini adalah bersifat komersial dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.



**PEMBERITAHUAN PERTANYAAN DEWAN RAKYAT,  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN HAJI MOHAMAD BIN SABU (KOTA RAJA)**

**TARIKH : 1 DISEMBER 2020 (SELASA)**

**SOALAN**

Minta **MENTERI PERTAHANAN** menyatakan perincian daripada lawatan rasmi Menteri Pertahanan China ke Malaysia pada 7 September 2020 yang tidak menerima liputan mana-mana media. Bagaimanakah lawatan tersebut dapat memperkukuhkan hubungan diplomasi antara dua negara serta dapat membantu negara menghadapi cabaran ekonomi ekoran pandemik COVID-19.

**JAWAPAN**

Tuan Yang di-Pertua,

Malaysia dan China mempunyai hubungan yang telah lama terjalin sejak tahun 1974 apabila Malaysia menjadi negara pertama di Asia Tenggara yang menjalin hubungan diplomatik dengan China. Hubungan pertahanan dua hala antara Malaysia dan China telah mula dimeterai melalui Memorandum Persefahaman dalam Kerjasama Pertahanan yang telah ditandatangani pada tahun 2005.

Bersandarkan kepada keakraban dan peningkatan kerjasama pertahanan antara kedua-dua negara, pada 7 September 2020 Tuan Yang Terutama (TYT) Jeneral Wei Fenghe, Menteri Pertahanan Nasional Republik Rakyat China telah mengadakan lawatan ulung beliau ke Malaysia yang juga merupakan negara pertama yang dilawati dalam rangka lawatan kerja beliau ke beberapa negara di rantau Asia Tenggara.

Lawatan kerja Menteri Pertahanan Nasional Republik Rakyat China memfokuskan kepada hubungan pertahanan dua hala di mana Malaysia dan China telah mengesahkan komitmen untuk memperkukuhkan lagi

kerjasama pertahanan dua hala sedia ada. Lawatan ini memperlihatkan keyakinan kedua-dua pihak bahawa aktiviti dua hala antara Malaysia dan China akan kembali aktif apabila situasi wabak COVID-19 bertambah baik. Selain membincangkan mengenai hubungan pertahanan dua hala, kedua-dua pihak turut menyentuh mengenai cabaran dalam norma baharu COVID-19 serta isu keselamatan serantau dan antarabangsa yang mempunyai kepentingan bersama termasuk Laut China Selatan. Malaysia menyatakan pendirian yang konsisten bahawa semua pihak perlu bekerjasama untuk memastikan keamanan, keselamatan dan kestabilan di Laut China Selatan dan sebarang perbezaan dan pertikaian harus ditangani secara damai dan rasional melalui dialog dan perundingan, tanpa sebarang ancaman atau menggunakan kekerasan.

Dalam membantu Malaysia menangani pandemik COVID-19, China adalah merupakan antara negara penyumbang terbesar yang memberi bantuan kepada Malaysia. Berdasarkan ikatan kerjasama yang erat, Kementerian Pertahanan Nasional Republik Rakyat China turut memberikan sumbangan bekalan perubatan khusus kepada petugas barisan hadapan Angkatan Tentera Malaysia (ATM). Selain itu, Bahagian Perkhidmatan Kesihatan ATM serta pakar perubatan daripada *People's Liberation Army* Republik Rakyat China turut berinteraksi melalui sidang video bagi berkongsi pengalaman dan membincangkan langkah-langkah terbaik dalam menangani situasi COVID-19. Bantuan-bantuan yang diterima ini membantu negara dalam meningkatkan semula kegiatan-kegiatan ekonomi.

Lawatan kerja Menteri Pertahanan Nasional Republik Rakyat China telah berjalan dengan lancar walaupun terikat dengan Prosedur Operasi Standard Perintah Kawalan Pergerakan Pemulihan (PKPP) yang ditetapkan oleh Majlis Keselamatan Negara (MKN) dan Kementerian Kesihatan Malaysia (KKM) termasuk pematuhan saringan COVID-19, pengawalan pergerakan dan tanpa liputan media. Walaupun dalam suasana ketidakpastian dan cabaran akibat wabak COVID-19, lawatan kerja Menteri Pertahanan Nasional Republik Rakyat China ke Malaysia mencerminkan kesungguhan Kerajaan China untuk memastikan hubungan diplomasi dan ikatan kerjasama antara kedua negara terus diperkukuhkan.

Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN KHOO POAY TIONG [KOTA MELAKA]**

**TARIKH : 1 DISEMBER 2020 (SELASA)**

**SOALAN**

**TUAN KHOO POAY TIONG [ KOTA MELAKA ]** minta **MENTERI KEWANGAN** menyatakan kadar pengangguran semasa di Malaysia, khasnya di kalangan graduan, dan sama ada Kerajaan akan meneruskan inisiatif Malaysians@Work seperti yang diumumkan oleh Kerajaan dalam Belanjawan 2020, dan jika tidak, mengapakan inisiatif itu tidak diteruskan.

**JAWAPAN**

Untuk makluman Ahli Yang Berhormat,

1. Kadar pengangguran dalam kalangan belia berumur 15 hingga 30 tahun mencatatkan penurunan yang memberangsangkan apabila buat pertama kalinya turun di bawah paras sembilan peratus sejak April 2020 iaitu pada 8.9 peratus atau 502,300 orang pada September 2020. Kadar pengangguran keseluruhannya kini pada kadar 4.6 peratus, iaitu pengurangan daripada 5.3 peratus yang direkodkan pada bulan Mei.
2. Dengan pasaran buruh yang lemah sekarang, graduan baharu dan lepasan sekolah akan menghadapi cabaran untuk mendapat peluang pekerjaan tetap. Inisiatif MalaysiaKerja atau Malaysians@Work tidak akan diteruskan dan telah dikaji semula disebabkan penularan COVID-19 dan digantikan dalam Belanjawan 2021 dengan Skim Jaminan Penjanaaan Pekerjaan (JanaKerja) yang melibatkan penyediaan 500 ribu peluang pekerjaan baharu termasuk pelbagai program peningkatan kemahiran dan latihan semula melalui perbelanjaan Kerajaan sebanyak 3.7 bilion ringgit.
3. Antara lain, Skim JanaKerja merangkumi, inisiatif pengambilan pekerja di bawah PERKESO yang kini dikenali sebagai PenjanaKerjaya, pemerkasaan program peningkatan kemahiran dan latihan semula atau reskilling and upskilling serta inisiatif MySTEP atau Short-term Employment Programme.
4. Selain itu, mana-mana majikan yang mengambil pekerja dalam kalangan graduan untuk menyertai program perantisan layak mendapatkan insentif sebanyak RM1,000 sebulan sehingga 3 bulan bagi setiap graduan baharu yang menyertai program berkenaan. Sebagai tambahan, majikan juga boleh menuntut geran sehingga RM4,000 untuk program latihan perantis. Program ini dijangka memanfaatkan sehingga 50 ribu graduan baharu dengan peruntukan 250 juta ringgit.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI UTAMA HAJI MUKHRIZ BIN TUN  
DR. MAHATHIR [ JERLUN ]**

**TARIKH : 1 DISEMBER 2020 (SELASA)**

**SOALAN**

Minta **MENTERI SAINS, TEKNOLOGI DAN INOVASI** menyatakan jelaskan adakah makmal tempatan, baik swasta mahupun agensi Kerajaan turut berusaha mencari formula vaksin untuk COVID-19, tanpa bergantung sepenuhnya kepada penemuan vaksin oleh makmal luar negara. Sekiranya tidak, nyatakan kekangan yang dihadapi makmal-makmal tempatan, baik dari segi dana dan kepakaran.

**JAWAPAN**

**Tuan Yang di-Pertua,**

Buat masa ini Malaysia tidak mempunyai fasiliti lengkap untuk pembuatan vaksin bagi kegunaan kesihatan manusia. Menyedari keadaan semasa memerlukan satu tindakan yang positif, mesyuarat Majlis Sains Negara sebelum ini telah bersetuju agar satu roadmap pembangunan vaksin negara dibangunkan dengan objektif menjadikan Malaysia sebagai negara pengeluar vaksin manusia dalam tempoh 10 tahun. Roadmap ini dijangka siap pada suku ke-2 tahun 2021.

Selain daripada pembangunan roadmap ini, MOSTI juga telah menawarkan skim dana baharu iaitu MOSTI Combating COVID-19 Fund yang menggalakkan projek R&D dalam memerangi dan mengawal wabak COVID-19. MOSTI telah meluluskan satu projek menerusi tabung ini yang berjumlah RM2.1 juta ke Universiti Malaya bagi pembangunan vaksin

COVID19. MOSTI berharap inisiatif ini menjadi sebuah platform bagi penciptaan vaksin tempatan seterusnya dapat mengurangkan kebergantungan bekalan vaksin dari luar negara.

Selain daripada itu, kerajaan juga turut memasukkan elemen pemindahan teknologi dan kepakaran menerusi rundingan yang sedang dibuat bagi tujuan perolehan vaksin daripada negara atau syarikat farmaseutikal luar negara. Sebagai contoh, perjanjian kerjasama antara Kerajaan Malaysia dan Kerajaan China yang ditandatangani turut bersetuju untuk memperkukuhkan kerjasama bagi tujuan penyelidikan dan pembangunan vaksin pada masa hadapan. Begitu juga perbincangan awal dengan pihak Rusia adalah tidak terhad kepada pembelian vaksin tetapi juga pemindahan kepakaran membangunkan vaksin COVID-19 dan untuk virus lain di Malaysia.

Sepertimana yang telah diumumkan sebelum ini, Kerajaan telah mengenalpasti dua buah syarikat GLC yang mempunyai kemampuan bagi tujuan pembotolan vaksin atau *fill and finish* iaitu PharmaNiaga dan Duopharma. kedua-dua syarikat ini mempunyai fasiliti yang berkemampuan untuk melaksanakan fill and finish. Duopharma akan menggunakan kemudahan sedia ada di Klang untuk melaksanakan fill and finish. Kemudahan tersebut perlu dinaik taraf dan dijangka akan disiapkan menjelang awal 2021. Manakala Pharmaniaga mempunyai kemudahan sedia ada yang boleh diubahsuai bagi tujuan *fill and finish*.

Keputusan pemilihan syarikat bagi tujuan *fill and finish* ini tidak hanya tertakluk kepada Duopharma dan Pharmaniaga sahaja. Kerajaan turut menggalakkan mana-mana syarikat yang boleh melaksanakan *fill and finish* ataupun membuat pelaburan dalam pembuatan vaksin daripada pihak swasta juga. Pemilihan syarikat dilakukan berdasarkan keupayaan untuk mengilang produk farmaseutikal tempatan yang telah memenuhi keperluan amalan perkilangan baik (GMP) dan mengikut standard *Pharmaceutical Inspection Co-operation Scheme*. Pemilihan pengilang yang telah memenuhi standard ini sangat penting bagi memastikan aspek technology transfer boleh berjalan dengan lancar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' IR HAJI AMIRUDDIN BIN HAMZAH  
[KUBANG PASU]**

**TARIKH : 1 DISEMBER 2020 (SELASA)**

**SOALAN**

**DATO' IR HAJI AMIRUDDIN BIN HAMZAH [ KUBANG PASU ]** minta **MENTERI KEWANGAN** menyatakan:-

- (a) jumlah hasil Kerajaan yang terkini berbanding unjuran di dalam Belanjawan 2020; dan
- (b) anggaran hasil Kerajaan yang bakal diperoleh Kerajaan sehingga Disember 2020.

**JAWAPAN**

**Tuan Yang di-Pertua,**

1. Semasa pembentangan Belanjawan 2020, Kerajaan telah mengumumkan unjuran jumlah hasil Kerajaan Persekutuan bagi tahun 2020 sebanyak RM244.5 bilion dengan andaian pertumbuhan ekonomi 4.8% dan harga minyak mentah dunia Brent USD62 setong. Namun, krisis pandemik COVID-19 telah memberi impak yang besar kepada ekonomi dan kedudukan kewangan Kerajaan Persekutuan. Sehubungan itu, anggaran hasil dijangka mengalami pengurangan sekitar 18% atau RM42 bilion pada 2020 dengan anggaran ekonomi menguncup antara 4.5%-5.5% dan harga minyak USD40 setong.

2. Pengurangan tersebut disebabkan oleh pendapatan perniagaan yang lebih rendah kerana aktiviti ekonomi yang perlahan selaras dengan kawalan pergerakan global dan tindakan pencegahan. Di samping itu, pengurangan kutipan hasil sebahagiannya disebabkan oleh pengumuman beberapa langkah cukai di bawah pakej rangsangan ekonomi untuk membantu serta meringankan beban aliran tunai rakyat serta perniagaan, termasuklah penangguhan bayaran cukai untuk semua perniagaan dalam sektor pelancongan sehingga Disember 2020 dan penundaan bayaran cukai dari April hingga Jun 2020 untuk perusahaan kecil dan sederhana (PKS). Langkah cukai lain termasuk pengecualian duti setem perjanjian jual beli serta pembiayaan rumah, pelepasan cukai pendapatan individu untuk perbelanjaan perjalanan domestik, dan pengecualian Cukai Keuntungan Harta Tanah (CKHT) ke atas keuntungan pelupusan dari 1 Jun 2020 hingga 31 Disember 2021.

3. Pengurangan kutipan hasil tersebut sebahagiannya akan ditampung oleh dividen tambahan dan bayaran khas daripada entiti Kerajaan yang berjumlah RM25 bilion, antaranya dividen khas PETRONAS sebanyak RM10 bilion, dividen Bank Negara Malaysia iaitu RM1.5 bilion dan dividen Khazanah Nasional Berhad sebanyak RM1 bilion. Di samping itu, Kerajaan juga menerima bayaran khas daripada Kumpulan Wang Persaraan Diperbadankan (KWAP) berjumlah RM5 bilion bagi membiayai sebahagian bayaran pencen tahun semasa. Sehubungan itu, hasil Kerajaan Persekutuan pada tahun 2020 disemak kepada RM227.3 bilion.

4. Bagi tempoh Januari sehingga September 2020 pula, jumlah hasil Kerajaan Persekutuan yang telah dikutip adalah sebanyak RM148.2 bilion, disumbangkan oleh hasil cukai iaitu RM95.9 bilion manakala selebihnya sebanyak RM52.3 bilion adalah hasil bukan cukai. Walau bagaimanapun, hasil Kerajaan Persekutuan dijangka meningkat pada suku keempat, antaranya disumbangkan oleh kutipan hasil cukai yang lebih tinggi kerana kebanyakan syarikat telah mula membuat bayaran cukai mengikut jadual dan jangkaan terimaan dividen daripada entiti Kerajaan. Oleh itu, Kerajaan Persekutuan masih mengekalkan anggaran kutipan hasil 2020 yang berjumlah RM227.3 bilion seperti mana yang telah diterbitkan di dalam penerbitan Tinjauan Fiskal dan Anggaran Hasil Kerajaan Persekutuan Tahun 2021.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN CHARLES ANTHONY SANTIAGO  
[KLANG]**

**TARIKH : 01 DISEMBER 2020 (SELASA)**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI KEWANGAN** menyatakan pecahan penyakit kritikal seperti kanser, berapakah pembayaran yang telah dilakukan bagi pemohon di bawah skim mySalam setakat ini, dan bagaimana Kerajaan akan memastikan jumlah keseluruhan RM2 bilion akan dibayar sepenuhnya oleh Great Eastern.

**JAWAPAN**

Tuan Yang di-Pertua,

1. Sebagaimana Yang Berhormat sedia maklum, Skim mySalam menyediakan dua manfaat utama iaitu pembayaran sebanyak RM8,000 sekaligus sekiranya pencarum disahkan menghadapi mana-mana satu daripada 42 penyakit kritikal seperti kanser, penyakit jantung, Alzheimer dan lain-lain. Disamping itu, penggantian pendapatan sebanyak RM50 sehari untuk tempoh maksimum 14 hari, atau RM700 setiap tahun, juga diberi kepada mereka yang menerima rawatan di mana-mana hospital kerajaan. Berdasarkan rekod, semenjak program mySalam diperkenalkan pada tahun 2019 sehingga 31 Oktober 2020, jumlah tuntutan penyakit kritikal yang telah diluluskan adalah sebanyak 6,370 tuntutan dengan jumlah pembayaran yang telah disalurkan sebanyak RM50.96 juta.

2. Untuk makluman Ahli Yang Berhormat juga, jumlah keseluruhan sumbangan RM2 bilion yang telah diterima masuk ke dalam dana mySalam adalah untuk menampung keperluan program untuk tempoh 5 tahun. Dalam tempoh ini, Kerajaan dan pasukan mySalam di bawah Great Eastern Takaful Berhad telah bergerak dari satu lokasi ke lokasi lain termasuk bekerjasama dengan pihak *Urban Transformation Centre* (UTC) bagi mempromosikan dan meningkatkan kesedaran tentang Skim ini dan secara atas talian dalam musim COVID-19 ini. Impak aktiviti-aktiviti ini dapat dilihat dengan kenaikan ketara jumlah tuntutan dari bulan ke bulan dan dijangkakan akan terus naik dengan aktiviti-aktiviti lanjutan yang telah dirancang oleh pasukan mySalam.

3. Sebanyak 100 buah kios mySalam telah berjaya dibuka di hospital-hospital kerajaan seluruh negara dengan dua orang petugas untuk memberikan maklumat tepat mengenai skim selain memudah cara ahli mySalam untuk membuat tuntutan yang dilakukan secara atas talian. Dijangkakan kios akan dapat ditempatkan di semua 151 hospital kerajaan di seluruh negara pada penghujung tahun 2020. Kerajaan juga pada masa ini sedang mengkaji keperluan lain yang boleh diperluaskan di bawah skim mySalam bagi memastikan kumpulan B40 akan dapat menikmati faedah insurans percuma dengan sebaiknya. Selaras dengan itu, di dalam Ucapan Belanjawan 2021, Kerajaan memperluas perlindungan mySalam dalam membiayai kos peranti perubatan seperti *stent* untuk jantung atau protezis.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NOORITA BINTI SUAL [TENOM]**

**TARIKH : 1 DISEMBER 2020 (SELASA)**

**SOALAN**

Minta **MENTERI SAINS, TEKNOLOGI DAN INOVASI** menyatakan langkah-langkah yang telah dirancang untuk memastikan bahawa negara akan mempunyai bekalan vaksin COVID-19 apabila dikeluarkan kelak.

**JAWAPAN**

Tuan Yang di-Pertua,

Jaminan akses awal bekalan vaksin COVID-19 adalah penting untuk melindungi rakyat Malaysia dari COVID-19 dan selanjutnya membantu merancakkan ekonomi negara. Justeru, pendekatan *multi-pronged* termasuk penyertaan dalam *Coalition for Epidemic Preparedness Innovations* (CEPI), rundingan *bilateral* secara *Government-to-Government*) dan *multilateral* seperti COVAX Facility; bagi membuka ruang untuk negara mempelbagaikan pilihan serta mengurangkan atau menyebarkan risiko daripada memberikan tumpuan kepada suatu kaedah sahaja.

Jemaah Menteri telah bersetuju untuk Malaysia menyertai inisiatif Malaysia-CEPI *Joint Program for Capacity Building & Technology Transfer* dalam bidang R&D, ujian klinikal di Malaysia ke atas calon vaksin COVID-19 yang dibangunkan oleh CEPI dan pengujian calon vaksin tempatan ke atas COVID-19. Sehubungan itu, MOSTI telah menandatangani **Perjanjian Bilateral Investor dengan CEPI pada 30 November 2020** bagi membolehkan Malaysia mendapat akses kepada

pembangunan vaksin, pemindahan teknologi dan kepakaran baharu kepada penyelidik tempatan.

Selain daripada itu, Mesyuarat Jemaah Menteri pada 14 Oktober 2020 telah bersetuju supaya Malaysia menyertai COVID-19 *Vaccine Global Access* (COVAX) yang diuruskan oleh *The Global Alliance for Vaccines and Immunizations* (GAVI) yang berpangkalan di Geneva, Switzerland. Malaysia melalui Kementerian Kesihatan telah menandatangani **Perjanjian Commitment Agreement (Optional Purchase Arrangement) COVAX Facility** pada **23 November 2020**. Antara kelebihan penyertaan dalam COVAX ialah Malaysia diberi peluang untuk bersama-sama negara lain dalam pembelian secara pukal, berhak melabur dalam calon vaksin COVID-19 yang sedang dikaji dan diberikan akses awal kepada vaksin bagi mengurangkan risiko jangkitan COVID-19. Pendekatan *multilateral* menerusi penyertaan dalam COVAX boleh disifatkan sebagai manifestasi Malaysia terhadap *global solidarity*. Walau bagaimanapun, pembekalan ini hanya melibatkan anggaran 10% populasi sahaja dan Malaysia masih boleh meneruskan perjanjian dengan negara-negara lain yang sedang menjalankan kajian calon vaksin COVID-19.

Selain itu, rundingan secara *bilateral* sedang giat dijalankan dengan pelbagai pihak bagi jaminan akses bekalan vaksin kerana Malaysia berhak untuk membuat pilihan pemerolehan vaksin yang lebih telus bagi mendapat nilai terbaik serta menjaga kepentingan negara secara menyeluruh. Sehubungan itu, **MOSTI telah menandatangani Perjanjian Kerjasama dengan Kementerian Sains dan Teknologi (MOST), Republik Rakyat China (RRC) pada 18 November 2020** bagi memudahkan perolehan vaksin dari syarikat-syarikat pengeluar vaksin dari negara China dengan menggunakan pendekatan *Government to Government* (G2G). Dalam hal ini, dengan pemeteraian perjanjian tersebut, ia dapat meningkatkan hubungan kolaborasi strategik Malaysia dengan RRC dalam bidang vaksin. Usaha sama ini juga dilihat sebagai salah satu langkah jangka masa panjang bagi pembangunan vaksin untuk manusia dijalankan dalam penghasilan pelbagai vaksin yang berkesan dan halal di Malaysia pada masa hadapan.

Selain meneruskan rundingan dan memeterai perjanjian usaha sama mendapatkan akses kepada vaksin COVID-19 dengan negara-negara tertentu secara kerajaan dengan kerajaan (G2G), pembekalan vaksin COVID-19 peringkat komersial (B2B) daripada syarikat-syarikat farmaseutikal dari negara tertentu perlu diambil kira bagi tujuan mendapatkan akses awal kepada vaksin berkenaan. Sehubungan itu, Malaysia melalui **Kementerian Kesihatan telah menandatangani perjanjian pembelian awal dengan syarikat farmaseutikal Pfizer pada 24 November 2020** lalu untuk mendapatkan bekalan vaksin COVID-19.

Kolaborasi sebegini adalah amat penting dalam menggerakkan hubungan diplomatik negara bagi memastikan Malaysia diberi keutamaan serta dilibat sama dalam proses penghasilan vaksin. Diplomasi sains melalui jaringan antarabangsa ini diharap dapat mengurangkan tempoh menunggu bagi Malaysia mendapatkan vaksin.

MOSTI juga telah menawarkan skim dana baharu iaitu MOSTI Combating COVID-19 Fund yang menggalakkan projek R&D dalam memerangi dan mengawal wabak COVID-19. MOSTI telah meluluskan satu projek menerusi tabung ini yang berjumlah RM2.1 juta ke Universiti Malaya bagi pembangunan vaksin COVID19.

Sehingga 12 November 2020, Pertubuhan Kesihatan Sedunia (WHO) melaporkan sebanyak 212 vaksin sedang dibangunkan di peringkat global di mana 48 daripada jumlah tersebut telah mencapai fasa ujian klinikal. Sebanyak 11 daripada 48 calon vaksin ini telah pun berada di ujian klinikal fasa 3. Beberapa buah negara telah mengadakan rundingan dengan pengeluar-pengeluar vaksin bagi mendapatkan jaminan bekalan vaksin seawal mungkin menerusi perjanjian perolehan ke hadapan (*advance purchase agreement*). Setakat ini, KKM telah berhubung dengan sepuluh (10) calon vaksin yang kini berada di peringkat ujian klinikal fasa tiga. Malaysia dijangka memperolehi bekalan vaksin seawal suku pertama tahun 2020/21 bergantung kepada kelulusan oleh *National Pharmaceutical Regulatory Agency* (NPRA) di bawah Kementerian Kesihatan dengan sasaran kumpulan pertama penerima vaksin adalah petugas barisan hadapan sector kesihatan dan bukan kesihatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROZMAN BIN ISLI [ LABUAN ]**

**TARIKH : 1 DISEMBER 2020 (SELASA)**

**SOALAN**

Minta **MENTERI SAINS, TEKNOLOGI DAN INOVASI** menyatakan apakah progres penyelidikan dan penyediaan vaksin COVID-19 yang sedang berlaku dimana-mana negara dan apakah hubungan kerjasama yang ada dengan negara kita dan bilakah ia tersedia untuk rakyat Malaysia.

**JAWAPAN**

Tuan Yang di-Pertua,

Berdasarkan kepada laporan data Pertubuhan Kesihatan Sedunia (WHO) sehingga 12 November 2020, sebanyak 212 vaksin sedang dibangunkan di peringkat global dimana 48 daripada jumlah tersebut telah mencapai fasa ujian klinikal. Daripada 48 calon vaksin tersebut, 11 daripadanya telah memasuki fasa 3 ujian klinikal.

Kerajaan Malaysia mengambil pendekatan *multi-pronged* termasuk penyertaan dalam *Coalition for Epidemic Preparedness Innovations* (CEPI), rundingan *bilateral* secara *Government-to-Government*) dan *multilateral* seperti COVAX Facility. Ini adalah bagi membuka ruang untuk negara mempelbagaikan pilihan serta mengurangkan atau menyebarkan risiko daripada memberikan tumpuan kepada suatu kaedah sahaja.

Untuk makluman Ahli Yang Berhormat, Jemaah Menteri telah bersetuju untuk Malaysia menyertai inisiatif Malaysia-CEPI *Joint Program for Capacity Building & Technology Transfer* dalam bidang R&D, ujian klinikal di Malaysia ke atas calon vaksin COVID-19 yang dibangunkan oleh CEPI dan pengujian calon vaksin tempatan ke atas COVID-19. Sehubungan itu, MOSTI telah menandatangani **Perjanjian Bilateral Investor dengan CEPI pada 30 November 2020** bagi membolehkan Malaysia mendapat akses kepada pembangunan vaksin, pemindahan teknologi dan kepakaran baharu kepada penyelidik tempatan.

Selain daripada itu, Mesyuarat Jemaah Menteri pada 14 Oktober 2020 telah bersetuju supaya Malaysia menyertai COVID-19 *Vaccine Global Access* (COVAX) yang diuruskan oleh *The Global Alliance for Vaccines and Immunizations* (GAVI) yang berpangkalan di Geneva, Switzerland. Malaysia melalui Kementerian Kesihatan telah menandatangani **Perjanjian Commitment Agreement (Optional Purchase Arrangement) COVAX Facility pada 23 November 2020**. Antara kelebihan penyertaan dalam COVAX ialah Malaysia diberi peluang untuk bersama-sama negara lain dalam pembelian secara pukal, berhak melabur dalam calon vaksin COVID-19 yang sedang dikaji dan diberikan akses awal kepada vaksin bagi mengurangkan risiko jangkitan COVID-19. Pendekatan *multilateral* menerusi penyertaan dalam COVAX boleh disifatkan sebagai manifestasi Malaysia terhadap *global solidarity*. Walau bagaimanapun, pembekalan ini hanya melibatkan anggaran 10% populasi sahaja dan Malaysia masih boleh meneruskan perjanjian dengan negara-negara lain yang sedang menjalankan kajian calon vaksin COVID-19.

Selain itu, rundingan secara *bilateral* sedang giat dijalankan dengan pelbagai pihak bagi jaminan akses bekalan vaksin kerana Malaysia berhak untuk membuat pilihan pemerolehan vaksin yang lebih telus bagi mendapat nilai terbaik serta menjaga kepentingan negara secara menyeluruh. Sehubungan itu, **MOSTI telah menandatangani Perjanjian Kerjasama dengan Kementerian Sains dan Teknologi (MOST), Republik Rakyat China (RRC) pada 18 November 2020** bagi memudahkan perolehan vaksin dari syarikat-syarikat pengeluar vaksin dari negara China dengan menggunakan pendekatan *Government to Government* (G2G). Dalam hal ini, dengan pemeteraian perjanjian tersebut, ia dapat meningkatkan hubungan kolaborasi strategik Malaysia

dengan RRC dalam bidang vaksin. Usaha sama ini juga dilihat sebagai salah satu langkah jangka masa panjang bagi pembangunan vaksin untuk manusia dijalankan dalam penghasilan pelbagai vaksin yang berkesan dan halal di Malaysia pada masa hadapan.

Selain meneruskan rundingan dan memeterai perjanjian usaha sama mendapatkan akses kepada vaksin COVID-19 dengan negara-negara tertentu secara kerajaan dengan kerajaan (G2G), pembekalan vaksin COVID-19 peringkat komersial (B2B) daripada syarikat-syarikat farmaseutikal dari negara tertentu perlu diambil kira bagi tujuan mendapatkan akses awal kepada vaksin berkenaan. Sehubungan itu, Malaysia melalui **Kementerian Kesihatan telah menandatangani perjanjian pembelian awal dengan syarikat farmaseutikal Pfizer pada 24 November 2020** lalu untuk mendapatkan bekalan vaksin COVID-19.

Seperti mana pembentangan bajet baru-baru ini, peruntukan berjumlah RM3 bilion telah diberikan untuk tujuan pembelian vaksin COVID-19. Ini menunjukkan Kerajaan begitu komited untuk memastikan keselamatan dan kesejahteraan rakyat dalam membendung pandemik COVID-19. Kerajaan telah bersetuju mewujudkan satu Jawatankuasa Khas Jaminan Akses Bekalan Vaksin COVID-19 (JKJAV) yang dipengerusikan oleh Menteri Kesihatan dan Menteri Sains, Teknologi dan Inovasi ditubuhkan bagi memastikan bekalan vaksin COVID-19 dapat diperolehi dengan kadar segera, selamat dan sempurna. Setiap calon vaksin COVID-19 akan dipastikan faktor keselamatan (*safety*), keberkesanan (*efficacy*) dan kestabilan (*stability*) sebelum didaftar dan digunakan dalam negara oleh *National Pharmaceutical Regulatory Agency* (NPRA) di bawah Kementerian Kesihatan.

Secara dasarnya JKJAV telah bersetuju membahagikan kepada 3 fasa keutamaan iaitu pertama: kumpulan barisan hadapan melibatkan kakitangan KKM dan agensi bukan KKM seperti Polis, Angkatan Tentera, Imigresen, Penjara dan lain lain; kedua: kumpulan berisiko tinggi seperti individu yang mempunyai co-mobid dan warga emas; dan ketiga: kumpulan populasi dewasa yang lain. Perincian lanjut kumpulan-kumpulan ini sedang dibuat dan dijangka akan diumumkan seawal suku pertama tahun hadapan.

Sekian, terima kasih.



**MESYUARAT KETIGA, PENGGAL KETIGA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : TUAN AHMAD BIN HASSAN [ PAPAR ]**

**TARIKH : 1 DISEMBER 2020 (SELASA)**

**SOALAN**

minta **MENTERI PEMBANGUNAN LUAR BANDAR** menyatakan mekanisme drastik yang sedang diimplementasikan oleh Kementerian dalam mewujudkan sistem pengendalian pembekalan air bersih di kawasan-kawasan luar bandar di Sabah yang mengalami kesukaran untuk mendapatkan sumber air bersih, khususnya selepas berlakunya banjir dan pencemaran sungai

**JAWAPAN**

**Tuan Yang di-Pertua,**

Untuk makluman Yang Berhormat, secara dasarnya, penyediaan bekalan air bersih dan terawat adalah di bawah tanggungjawab Kerajaan Negeri dan Pihak Berkuasa Air Negeri (PBAN) yang melibatkan penyediaan sumber air, pembinaan paip utama, pembinaan loji rawatan air serta pengoperasian dan penyelenggaraan.

Peranan dan matlamat Kementerian Pembangunan Luar Bandar (KPLB) adalah membantu mempercepatkan liputan dan merapatkan jurang bekalan air bersih dan terawat ke kawasan luar bandar melalui penyambungan paip retikulasi dari paip utama ke rumah-rumah yang belum mendapat bekalan air bersih dan terawat.

Bagi kawasan-kawasan luar bandar yang kritikal, Kementerian boleh mempertimbangkan membina atau menaiktaraf loji rawatan air, pembinaan paip utama, pembinaan tangki dan rumah pam bagi memastikan kawasan sasaran mendapat bekalan air terawat dengan tekanan dan kapasiti yang mencukupi.

Manakala bagi kawasan pendalaman dan yang jauh dari sumber air bersih dan terawat, Kementerian menyediakan sistem alternatif menggunakan sumber air bawah tanah, tandak sungai, perigi dan sumber air hujan bagi tujuan bekalan air bersih.

Sekian, terima kasih.